

**ASO LUA, 26 ME 2015**

*Na tauaofia le Fono Aoao Faitulafono i le itula e 9:20 i le taeao e tusa ai ma le Polokalame o Fonotaga a le Palemene 2015.*

Tatalo.

**MALELEGA MAI LE AO O LE MALO**

*Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.*

**“TUSI mo:**

**Le Fofoga Fetalai:**

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoao Faitulafono e iloiloaina ai ia Tulafono Tau Faaofi ua faaalua iinei:

1. Tulafono Tau Faaofi o Teuteuga o le Tulafono o Tamaiti 2015.
2. Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2015.
3. Tulafono Tau Faaofi o Teuteuga o le Tulafono o Galuega tau Leoleo 2015.
4. Tulafono Tau Faaofi o Teuteuga o le Tulafono o Lafoga o Tupe Mau 2015.
5. Tulafono Tau Faaofi o Teuteuga o le Tulafono o le Faavae (Nu. 2) 2015.
6. Tulafono Tau Faaofi o Lafoga o Oloa ma Galuega Faatino e Faia i Luga o Aofaiga o Tau 2015.
7. Tulafono Tau Faaofi o le Faatatauina o Tupe Faaopoopo (Nu. 2) 2014/2015.
8. Tulafono Tau Faaofi o le Faatatauina o Tupe 2015/2016.

**TUUINA ATU** i lou nei Lima i lenei aso 25 o Me i le tausaga 2015.

**(Sainia): Tui Atua Tupua Tamasese Efi**  
**O LE AO O LE MALO.”**

## SAUNOAGA FAAFEILOAI A LE FOFOGA FETALAI

**FOFOGA FETALAI:** I le agaga faaaloalo i le ava tele i lenei itula o lenei taeao fou, ou te faatalofa atu ma ou ofo alofa atu i le paia ma le mamalu o le tatou Maota i ona tulaga faalupelupe i le alafai mai i faguga lelei i le soifua manuia o le paia ma le mamalu o le tatou Palemene i ona mamalu ma ona paia maualuga sauoo e masani ai, i le afio o lau Afioga i le Taitai o le Malo lau Afioga i le Palemia ma lau Kapeneta, afio foi lau Afioga i le Taitai o le Itu Agai ma sui usufono mamalu uma o le tatou Maota Fono i lenei taeao.

E manatu e le faaitiitia le agaga faafetai i le Atua ona o lea ua tatou fesilafai i magafetau ola ma magafetau soifua i le tatou lagima ma le soifua maloloina lelei, ua tatou toe aofaga potopoto ai i lenei taeao fou. O le aso na atofa e le o se aso na faafuaveta sa ioeina e le tatou Palemene, o le aso o le a tatou lauluafesilafai ai e toe faaauau ma fono talatala le tatou Palemene e ala i le faaauauina o feau ma tiute ma galuega, aemaise o galuega faatino e pei ona faapolokalameina.

Ua ou ofo alofa atu ma faatalofa atu i le tulaga aloaia, malo le soifua manuia, malo le soifua maua, e manatu ua matagofie lenei taeao o lea ua atoatagi le paia o le tatou Maota.

Ou te ofo alofa atu ma faatalofa atu i le paia o le tatou atunuu ua tatou faatasi i lenei aso, i tupu ma ee, o tamalii ma failauga, faletua ma tausii o saoa ma tamaitai, vaeane a tatou fanau pele ua tatou mafuta i lenei aso, le paia o Faauluuluga o Matagaluega ma Faalapotopotoga a le Malo i ona vaega eseese, malo le galulue, faamalo le onosai faafetai le tautua Malo, o lea ua tatou fesilafai i lenei taeao.

E faapena foi ona ou faafeiloai atu aloaia i le paia ma le mamalu o pule aoga, o faiaoga aemaise o tatou fanau pele i lenei taeao, faafetai ua tatou toe faatasi ona o polokalame aloaia a lou Palemene o le faalauiloaina lea o le tatou Palemene e amata mai lava i aoga amata, tulagalua seia oo i kolisi maualuluga, o lea ua tatou feagai i le aso, ia se i outou omai se i outou silasila i mea o lo o nutimea ai ma lipoi ma fai tonu o le atunuu. O le aso ma le filiga, o le aso ma le mataigatila, o a matou nei, a o outou taeao. O le agaga ma le faamoemoe o le tatou Malo i ona tulaga ma polokalame faataatitia ina ia sau malama, ia outou silafia o le a le mea e tau o le Palemene i Samoa? A o lenei taeao, faafetai o lea ua tatou fesilafai, ma ia aoga lo outou faatasi mai ma fai se ai o lenei polokalame.

E ofo alofa atu ma faatalofa atu i le tapuaiga a Samoa le atunuu, ia o ou sa ma ou faiga e nuunuu atu ia faatini o tausala i le tapuaiga i Lana Afioga Mamalu, O Le Ao o le Malo ma lau Masiofo, le Sui o le Fono a Sui Tofia ma lau Masiofo, ia vaeane Tulatoa ma Fuesinaloloa o Samoa i ona tulaga faalupe le paia i Aiga ma o latou Tama, o Tama ma o latou Aiga, e le gata i lea o le fatuaiga tausii i le Aufaitatalo, ia mana pea le upu aua le Atua ma Lona finagalo o lo o ae ma le manuia ai faiva o lenei Palemene. Ia tapuai maia, o le a alo lou Palemene i lenei taeao aua le faatinoga o galuega ua uma ona faataatia.

## TUUINA ATU O PEPA

*Na tolaulauina e le Failautusi Pepa nei ua faataatia i luga o le Laulau a Fono e tusa ai ma le T.T.48.*

1. P.P. 2015/2016 Nu. 3, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga 2013-2014.
2. P.P. 2015/2016 Nu. 4, Lipoti Faaletausaga a le Komisi o Galuega a le Malo o Samoa 2011-2012.
3. P.P. 2015/2016 Nu. 5, Lipoti Faaletausaga a le Komisi o Galuega a le Malo o Samoa 2012-2013.
4. P.P. 2015/2016 Nu. 6, Lipoti Faaletausaga a le Matagaluega o le Va i Fafo ma Fefaatauaiga 2011-2012.
5. P.P. 2015/2016 Nu. 7, Lipoti Faaletausaga a le Pulega o Malae ma Fale Taalo a Samoa 2013-2014.
6. P.P. 2015/2016 Nu. 8, Faamatalaga o Tupe a le Malo mo le Tausaga Faaletupe Faaiiina 30 Iuni 2014.
7. P.P. 2015/2016 Nu. 9, Lipoti Faaletausaga a le Faalapotopotoga o Mea tau Fale a Samoa mo le Tausaga 2014.
8. P.P. 2015/2016 Nu. 10, Tali atu a le Malo i le P.P. 2014/2015 Nu. 132, Lipoti a le Komiti o Mataupu tau Aoga i P.P. 2014/2015 Nu. 33, 34, 35, 36 & 37, Lipoti Faaletausaga a le Pulega o Faailoga ma Tusipasi Taualoa a Samoa mo Tausaga 2008/2009, 2009/2010, 2010/2011, 2011/2012 & 2012/2013.

## TUUINA ATU O LIPOTI A KOMITI FILIFILIA

*Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma T.T.51(5).*

1. P.P. 2015/2016 Nu. 11, Lipoti a le Komiti o Mataupu tau Faamasinoga, Leoleo & Falepuipui i le Tulafono Tau Faaofi o le Ofisa Autu o Mataupu Faaletulafono mo Tagata Lautele 2014.
2. P.P. 2015/2016 Nu. 12, Lipoti a le Komiti o Galuega, Tulafono Tumau, Maota Fono ma Mataupu tau Faiga Palota i le Tulafono Tau Faaofi o le Fono a le Au Tusitala ma le Au Faasalalau 2014.
3. P.P. 2015/2016 Nu. 13, Lipoti a le Komiti o Mataupu tau le Va i Fafo, Fefaatauaiga ma Tupe Maua i le Tulafono Tau Faaofi o Feagaiga i Sineva 2015.
4. P.P. 2015/2016 Nu. 14, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le Tulafono Tau Faaofi o Teuteuga o le Tulafono o Faiga Palota (Nu. 2) 2015.
5. P.P. 2015/2016 Nu. 15, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le Tulafono Tau Faaofi o Teuteuga o le Faavae (Nu. 2) 2014.
6. P.P. 2015/2016 Nu. 16, Lipoti a le Komiti o Tupe Maua ma Tupe Totogi i P.P. 2014/2015 Nu. 53, 54 & 55, Faamatalaga tau Tupe a le Malo mo le tausaga 2011, 2012 & 2013.

7. P.P. 2015/2016 Nu. 17, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2014/2015 Nu. 158, Fuafuaga Autasi Falemeli o Samoa 2015-2017 & P.P. 2014/2015 Nu. 176, Faamatalaga o Sini Autu a le Falemeli o Samoa 2015-2017.
8. P.P. 2015/2016 Nu. 18, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2014/2015 Nu. 159, Lipoti Faaletausaga a le Falemeli o Samoa 2011-2012 & P.P. 2014/2015 Nu. 205, Lipoti Faaletausaga a le Falemeli o Samoa 2013/2014.

### **LAFO A LE KOMITI O GALUEGA, TULAFONO TUMAU, MAOTA FONO MA MATAUPU TAU FAIGA PALOTA**

**Tofa AGAFILI PATISELA ETEUATI TOLOVAA (Sui Taitaifono, Komiti o Galuega, Tulafono Tumau, Maota Fono ma Mataupu tau Faiga Palota):** Faafetai lau Afioga i le Fofoga Fetalai, ae ou te le i faatuina le lafo pei ona tofia ai au e muamua ona avatu le faafetai i lau Afioga e tusa ai foi ma le talosaga molimoli i lenei taeao e faafetaia ai le alofa ma le agalelei o le Atua ona ua toe aofia lona Palemene e pei ona taupoina.

O lea ua uma ona saunoa faafeiloai lau Afioga i le Taitai o le Malo faapea le aiga Kapeneta, le Taitai o le Itu Agai faapea le Palemene o Samoa ua potopoto, e faapea foi le aofia ua potopoto ma le tapuaiga a Samoa, ma ou te talitonu, o lau saunoaga o lau tala foi lena i lo ta sa seelua.

Ae ua ou tulai atu ma le faaaloalo lau Afioga i le Fofoga Fetalai, ou te faatu atu le lafo, *E tusa ai ma le Tulafono Tumau 46 ina ia faaaauau Galuega Tuua o Tulafono Tau Faaofi mai i le Tauaofiaga 2014/2015 e pei ona tusia i le Pepa Faaopoopo o Galuega 2015/2016 Nu. 1.*

Faafetai.

*Faaluaina e se tasi o sui usufono mo Palota Taitoatasi, Susuga Hon Papaliitele Niko Lee Hang, sui usufono mo Aleipata Itupa i Lalo, ma le sui usufono mo Alataua Sisifo.*

*Na faamaonia le lafo ma faamaonia ai e le Fono Aoao Faitulafono le faaaauau o Galuega Tuua o Tulafono Tau Faaofi e pei ona tusia i le Pepa Faaopoopo o Galuega 2015/2016 Nu. 1.*

### **LAFO MO LE FAATAATIAESE O TULAFONO TUMAU**

**Susuga Hon TUILAIPA FATIALOFA AUJELUA LUPESOLIAI AIONO NEIOTI SAILELE MALIELEGAOI (Palemia):** Lau Afioga i le Fofoga Fetalai e faapena foi ona auai faatasi i le taulaga na e siitia e faafetai ai le alofa o le Atua i le toe faafoisia mai o Ana auauna nei o sui usufono mamalu o le Maota, aua le tauaofiaga lenei mo mataupu tuua a lo tatou Palemene.

E faatalofa atu foi i le mamalu o Faauluuluga o Matagaluega o lo o tatou auai e faapena foi ia fanau aoga o lo o lautogia i lenei taeao e mataitu Taualumaga o le Fonotaga.

O lea foi ou te tilotilo atu i fanau aoga ua outou matutua ua outou agavaa foi mo le fai monotaga, ai ua leva ona ova i le tai 25 o outou tausaga, ia ae ne i te i ua manatu se isi e faatino mea na ua outou vaavaai mai i ai ma outou faalavelave i se faiga palota lata mai, ia matau lelei mai matou, seiloga e matou te litaea ae ua talafeagai foi ma outou e tou te omai i totonu o le Palemene, ave le faaloalo i ē e tatau e ave i ai le faaloalo.

Lau Afioga i le Fofoga Fetalai, e lua ni lafo ua ou manatu e tatau ona faatu i le taeao nei e tusa o tatou galuega faagasolo.

O le lafo muamua, talu ai ua maea le feiloaiga a sui usufono sa faamalamalamaina ai Tulafono Tau Faaofi fou ia o le a faaofia i le taeao nei, ua ou tulai atu ai e faatu le lafo, *Ina ia faataatia ese Tulafono Tumau 100(1), ina ia avanoa ai le faitauga faalua o nei Tulafono Tau Faaofi i le aso fono e sosoo ai.*

Lua, ona o le taua tele o Tulafono Tau Faaofi nei e lua o le Tulafono o Teuteuga o le Tulafono o Faiga Palota (Nu. 2) 2015 ma le Tulafono o Teuteuga o le Faavae (Nu. 2) 2014, ua ou manatu ai e faatu le lafo, *Ina ia faataatiaese Tulafono Tumau 106 ma le Tulafono Tumau 107 ina ia avanoa ai le Iloiloga Auiliili ma le Faitauga Faatolu o ia Tulafono Tau Faaofi e lua i le aso fono lenei.*

O lafo na lau Afioga.

*Faaluaina e le Sui Palemia, Minisita mo Galuega Tau Alamanuia ma Atinae a le Malo ma le Minisita mo Fesootaiga ma Faamatalaga Tekonolosi.*

*Na faamaonia le lafo ma tulai ai Tulafono Tumau 100(1), Tulafono Tumau 106 & Tulafono Tumau 107 ua faataatiaese.*

## **TULAFONO TAU FAAOFI O TAUMAFI 2015**

### **– faitauga faatolu**

**FOFOGA FETALAI:** Mo le silafia e lenei Palemene o lenei Tulafono Tau Faaofi, sa faia lona iloiloga auiliili i le aso 22 Aperila 2015.

Tulai mai lau Afioga i le Palemia, i le le faatasi ai o le Minisita mo le Soifua Maloloina.

**Susuga Hon TUILAEP A FATIALOFA AU LUEA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ou te tulai atu ma le faaloalo e faatu le lafo, *Ina ia faitauina nei le Tulafono Tau Faaofi o Taumafi 2015 i lona faitauga faatolu.*

*Faaluaina e le Sui Palemia.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O LE FASIMATEINA O MANU MA LE  
FAASOA ATU O AANO O MANUFASI 2015 – faitauga faatolu**

**FOFOGA FETALAI:** Mo le silafia e le Palemene o le Tulafono Tau Faaofi leni sa fai lona iloiloga auiliili i le aso 22 Aperila 2015.  
Tulai mai lau Afioga i le Minisita mo Faatoaga, Faleoloa o Faatoaga.

**Afioga Hon LE MAMEA LEMALU SU'A LEATUAVAO TUILLETUFUGA ROPATI MUALIA (Minisita mo Faatoaga, Faleoloa o Faatoaga):** E muamua pea ona sii le viiga i le Atua i Lona alofa ma Lona agalelei ua taitai manuia mai ai foi lo outou soifua i leni taeao fou. Ou te momoli foi le faafetai mo le sauniga matagofie sa e tulei saunoa i ai lau Afioga i le Fofoga Fetalai. E faafetaia foi lau Afioga ona e matau atu, ua e faatagaina ona tuuina mai igoa matai uma o leni toeaina faatauavaa, o lo o faafofoga mai foi nai o matou nuu ma nai o matou aiga, ia e le faatauavaa foi ia te au le latou faaaloalo.

Ae ua ou tulai atu ma le faaaloalo tele lava lau Afioga, *Ina ia faitauina nei le Tulafono Tau Faaofi o le Fasimateina o Manu ma le Faasoa Atu o Aano o Manufasi 2015 i lona faitauga faatolu.*

*Faaluaina e le Minisita mo Galuega tau Alamanuia ma Atinae a le Malo, Minisita mo Fesootaiga ma Faamatalaga Tekonolosi, ma le Minisita mo Punaoa Faanatura ma le Siosiomaga.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE TULAFONO O LE  
FAAPUTUGATUPE MO LE LUMANAI MANUIA O TAGATA  
2015 – faitauga faatolu**

**FOFOGA FETALAI:** Mo le silafia e le Palemene o le Tulafono Tau Faaofi leni sa faia lona Iloiloga Auiliili i le aso 22 Aperila 2015.  
Tulai mai lau Afioga i le Palemia o le Minisita foi o Tupe.

**Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o Tulafono o le Faaputugatupe mo le Lumanai Manuia o Tagata 2015 i lona faitauga faatolu.*

*Faaluaina e le Sui Palemia.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE TULAFONO O LE  
FAAPUTUGATUPE MO LE LUMANAI MANUIA O TAGATA 2015 –  
iloiloga auiliili**

**FOFOGA FETALAI:** E tusa ai ma le Tulafono Tumau 106, e tataua ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Taitaifono o le Komiti o le Soifua Maloloina.

**Afioga Hon GATOLOAIFAANA AMATAGA ALESANA GIDLOW (Taitaifono Komiti o le Soifua Maloloina):** Lau Afioga i le Fofoga Fetalai ae ou te le i faatu le lafo, ou te faapipii atu foi i le momoliina o le faafetai i lo tatou Atua aua lo tatou faafeagai ai ma o tatou tiute e pei ona e saunoa ai. E faapea foi ona faatalofa atu i le mamalu o le Palemene ma a tatou malo faaaloaloga, ae tainane le faafogafoga mai a le tatou atunuu ma le Malo.

Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015 faatasi ma le Faasaoga.* Faafetai.

*Faaluaina e le Sui Fofoga Fetalai, se tasi o sui usufono mo Palota Taitoatasi, Susuga Hon Papaliitele Niko Lee Hang, ma le sui usufono mo Aleipata Itupa i Lalo.*

*Na faamaonia le Lipoti.*

**FOFOGA FETALAI:** E faasilasila atu ua faamaonia nei e le Fono Aoao le Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai i le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015.

O le a sagai atu le Fono Aoao i le Iloiloga Auiliili o le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

**FUAIUPU 2: Teuteuga i le Tulafono Autu.**

*Faamaonia.*

**FAAMATALAGA:**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o le Faaputugatupe mo le Lumanai Manuia o Tagata 2015.**

**FOFOGA FETALAI:** O lo o i ai le Faasaoga a le Komiti i le Fuaiupu 1 ma le Igoa.

Tulai mai lau Afioga i le Taitaifono o le Komiti.

**Afioga Hon GATOLOAIFAANA AMATAGA ALESANA GIDLOW:**  
Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

**“FAASAOGA:**

*Ia faaopoopo le upu (Nu. 2) i le Igoa o le Tulafono ma faitauina ai le Tulafono e faapea:*

**Teuteuga o le Tulafono o le Faaputugatupe mo le Lumanai Manuia o Tagata (Nu. 2) 2015.”**

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015 faatasi ma le Faasaoga.*

**TULAFONO TAU FAAOFI O TEUTEUGA O LE TULAFONO O TAMAITI 2015 - faitauga muamua**

**Afioga Hon FIAME NAOMI MATAAFA (Minisita mo Faamasinoga ma Pulega tau Faamasinoga):** Lau Afioga i le Fofoga Fetalai ou te faatalofa atu i leni taeao fou ua alafai mai i faguga lelei le paia o le Maota, tainane foi tatou Malo ua asiasi mai i leni taeao.

Ae ou te tulai atu ma le faaaloalo lau Afioga i le Fofoga Fetalai e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Tamaiti 2015 i lona faitauga muamua.*

*Faaluaina e le Sui Palemia ma le Minisita mo Galuega Tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi o Teuteuga o le Tulafono o Tamaiti 2015 i lona faitauga muamua.*



**TULAFONO TAU FAAOFI O TEUTEUGA O LE TULAFONO O LE  
FETUFAAIGA O FAAMATALAGA TAU LAFOGA 2015  
- faitauga muamua**

**Tofa Hon TUILOMA LAMEKO (Minisita mo Tupe Maua):** Lau Afioga i le Fofoga Fetalai ua ou tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Fetufaaiga o Faamatalaga Tau Lafoga 2015 i lona faitauga muamua.*

*Faaluaina e le Minisita mo Galuega Tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O TEUTEUGA O LE TULAFONO O  
GALUEGA TAU LEOLEO 2015 - faitauga muamua**

**Afioga Hon SALA FATA LISATI PINATI (Minisita mo Leoleo ma Falepuipui):** E muamua lava ona ou momoli atu le faafeai i lau Afioga ma ou faafeiloai atu i le paia o le Maota ua sasao nei.

Lau Afioga i le Fofoga Fetalai oute tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega Tau Leoleo 2015 i lona faitauga muamua.*

*Faaluaina e le Minisita mo Galuega, Felauaiga ma Atinae Eseese, Minisita mo Aoga, Taaloga ma Aganuu ma le Minisita mo Punaoa Faalenatura ma le Siosiomaga.*

*Na faamaonia le lafo ma faitauina le Tulafono Tau Faaofi o Teuteuga o le Tulafono o Galuega Tau Leoleo 2015 i lona faitauga muamua.*

**Afioga Hon Fiaame Naomi Mataafa:** Lau Afioga i le Fofoga Fetalai, faamolemole lava e fia fesili atu....

**FOFOGA FETALAI:** Se i tulai mai lau Afioga i le Minisita mo Faamasinoga ma Mataupu tau Faamasinoga.

**Afioga Hon Fiaame Naomi Mataafa:** E fia fesili atu i lau Afioga i le Fofoga Fetalai, o lea ua faagasolo nei le faitauga o tatou Tulafono Tau Faaofi i lona faitauga muamua, na ona faafesili atu lava faamolemole po o i ai ni kopi o tatou Tulafono Tau Faaofi, e le o i ai ni au kopi.

**FOFOGA FETALAI:** Malilie le tatou Ofisa e le i auai le Afioga i le Minisita, aumai se faila i i faamolemole. O lea sa fai le tatou briefing ananafi ma sa faaoo uma faila i sui usufono uma taitoatasi. Faamolemole le tatou Ofisa se i faaoo ifo kopi o tatou Tulafono Tau Faaofi.

**TULAFONO TAU FAAOFI O TEUTEUGA O LE TULAFONO O  
LAFOGA O TUPE MAUA 2015 - faitauga muamua**

**Tofa Hon TUILOMA LAMEKO:** Lau Afioga i le Fofoga Fetalai faapea foi sui usufono mamalu o le Maota, ou te tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2015 i lona faitauga muamua.*

*Faaluaina e le Minisita mo Galuega Tau Alamanuia ma Atinae a le Malo ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi o Teuteuga o le Tulafono o Lafoga o Tupe Maua 2015 i lona faitauga muamua.*

**TULAFONO TAU FAAOFI O TEUTEUGA O LE FAAVAE (NU.2)  
2015 - faitauga muamua**

**Susuga Hon TUILAEPFA FATIALOFA LUPESOLIAI AIONO NEIOTI  
SAILELE MALIELEGAOI:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Faavae (Nu.2) 2015 i lona faitauga muamua.*

*Faaluaina e le Sui Palemia.*

*Na faamaonia le lafo ma faitauina le Tulafono Tau Faaofi o Teuteuga o le Faavae (Nu.2) 2015 i lona faitauga muamua.*

**TULAFONO TAU FAAOFI O LAFOGA O OLOA MA GALUEGA  
FAATINO I LUGA O AOFAIGA O TAU 2015 - faitauga muamua**

**Tofa Hon TUILOMA LAMEKO:** Lau Afioga i le Fofoga Fetalai faapea foi sui usufono mamalu ua aofia i totonu o lenei Maota, ua ou tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Oloa ma Galuega Faatino i Luga o Aofaiga o Tau 2015 i lona faitauga muamua.*

*Faaluaina e le Minisita mo Galuega Tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi o Oloa ma Galuega Faatino i Luga o Aofaiga o Tau 2015 i lona faitauga muamua.*

**TULAFONO TAU FAAOFI O TEUTEUGA O LE TULAFONO O  
FAIGA PALOTA (NU.2) 2015 - iloiloga auiliili**

**FOFOGA FETALAI:** E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti o Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai lau Afioga i le Taitaifono o le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa.

Tulai mai lau Afioga i le Taitaifono o le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa.

**Afioga Hon LEAUPEPE TOLEAFOA APULU FAAFISI (Taitaifono o le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa):** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o Faiga Palota (Nu. 2) 2015 faatasi ma Teuteuga.*  
Faafetai.

*Faaluaia e le sui usufono mo Siumu.*

**Afioga Hon FIAME NAOMI MATAAFA:** Lau Afioga i le Fofoga Fetalai.....

**FOFOGA FETALAI:** Tulai mai lau Afioga i le Minisita.

**Afioga Hon FIAME NAOMI MATAAFA:** Lau Afioga i le Fofoga Fetalai, ona o le Lipoti lenei e faatino i se Tulafono sa ou tuuina mai i totonu o le Palemene, ma ou te tulai atu e fia fai sina Teuteuga laititi i le mau a le Komiti. Ma e i le faapoopo o upu nei i le faaiuga o le mau a le Komiti, o upu nei: *I le noatia ma le fai fuafua, i le iloiloga o le Lipoti e le Fono Aoa.*  
O le lafo lea faamolemole lau Afioga.

*Faaluaia e le Sui Palemia.*

**Afioga Hon FIAME NAOMI MATAAFA:** Leai lau Afioga ou te fia tautala faamalamalama i le mafuaaga o le toe teuteuga, ona e pei ona saunoa mai lau Afioga i le Tulafono Tumau e ao ona pasia muamua e le Tulafono, ia ona fai ai lea o le sailiiliga auiliili o le Tulafono. Ae peitai i le taatia mai o le Lipoti a le Komiti, o lo o i ai i le Fuaiupu e 5 ia se eseese o le mau a le Komiti ia ma le Tulafono na faataatia atu, ma e ou te manatu lau Afioga i le Fofoga Fetalai, o le autu o le lafo toe teuteu, ina ia mafai ona fai i ai se talanoaga ma se felafolafoaiga i le Fuaiupu lea e 5. Ae taitaiina ia le faamoemoe lau Afioga i le Fofoga Fetalai, pe fai atu le tala i le taimi lenei, pe fai atu i le taimi e oo atu ai le faagasologa o le auiliiliga i le Fuaiupu e 5.

**FOFOGA FETALAI:** Ia ou te taofi o lea ua taatia i lagotonu le faagasologa o tatou galuega pei ona masani ai, ou te talitonu foi ou te manatu e tataua ona tatou faasolo i le faasologa lea ua faataatia mai i le tatou Pepa o Galuega, afai lava e oo atu le tatou galuega i le mataupu tonu lea e finagalo i ai lau Afioga i le Minisita, ona tuu mai pea lea i luma o le lafo e auiliili i ai ma fai i ai le faaiuga a le Maota, pe talia lau lafo, pe teena lau lafo, ona faasolo ai lea o le tatou galuega. Ae le mafai ona ou taliaina i le taimi lenei, ona o lea faatoa amata atu ona tolaulau le auiliiliga o le tatou Tulafono, ae maua le avanoa pe a oo atu lava i le mataupu lea i tulaga masani i se mea o

finagalo i ai le Minisita e toe teuteu e ala i le faaiuga ma le fautuaga ua tuuina mai e le Komiti. O lau faaiuga lea Fiamē.

**Afioga Hon FIAME NAOMI MATAAFA:** Faafetai i lau Afioga ma ua ou taliaina i le faatagaga a lau Afioga e mafai ai ona fai se manatu faaalua ma se felafolafoaiga i le suiga o le faataatia mai e le Komiti i le Fuaiupu e 5, faafetai.

*Na faamaonia le Lipoti a le Komiti.*

**FOFOGA FETALAI:** E faasilasila atu ua faamaonia nei e le Fono Aoa le Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le Tulafono Tau Faaofi o Teuteuga o le Tulafono o Faiga Palota (Nu. 2) 2015.

O le a sagai atu le Fono Aoa i le Iloiloga Auiliili o le Tulafono Tau Faaofi o Teuteuga o le Tulafono o Faiga Palota (Nu. 2) 2015.

E tusa ai ma le Tulafono Tumau 102, e amata i le Iloiloga Auiliili o le Tulafono Tau Faaofi i le Fuaiupu 2.

### **FUAIUPU 2: Ua teuteuina le fuaiupu 5.**

*Faamaonia.*

### **FUAIUPU 3: Ua suia le fuaiupu 19.**

**FOFOGA FETALAI:** O lo o i ai le Teuteuga a le Komiti i le Fuaiupu 3. Tulai mai lau Afioga i le Taitaifono o le Komiti.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai ou te faatu le Teuteuga i le fuaiupu 3 e faapea:-

**“TEUTEUGA:**

*I le maea ai o le parakalafa (b) o le faafuaiupu (2), ia faaofi le parakalafa fou e faapea:-*

**AE VAGANA AI o se sui e Tauva mo Itumalo Tu Taulaga i le Palota Tele 2016 e tatau, ae le i maea le aso e faaulu ai Sui tauva, ona nofo ai i totonu o tuaoi o Itumalo Tu Taulaga ia le itiiti ifo i le 6 masina.”**

Ma lou faaaloalo, faafetai.

**Afioga Hon FIAME NAOMI MATAAFA:** Lau Afioga ona o le lafo ua tuuina mai, ou te lagona lava ou te lagolagoina le Teuteuga a le Komiti ona o lenei fuaiupu faaopoopo e faatino lea i agavaa mo sui tauva. Ma e atonu o lea e manatua e le Maota i le tatou Tulafono na pasia muamua i le toe Teuteuga o le Tulafono o Faiga Palota, sa faataatia mai ai e 6 masina e tatau ona nofoia ai

e se tagata ia se fanua umia saoloto, ona faatoa mafai lea ona lesitalaina e avea ma tagata palota. O le toe Teuteuga la lea, o le Teuteuga na faaauuala mai i le Komiti ma toe faaoo atu i le Kapeneta i ana iloiloga ma ua pasia foi e le Kapeneta, e faamautuina ai o se tagata e fia avea ma sui tauva e ao foi ia te ia ona alaala i luga o se fanua umia saoloto, i totonu o tuaoi ua faatulagaina mo itumalo ia tu taulaga. Ma o le taua o le toe Teuteuga lea, ona o lea faatoa oo mai le Lipoti a le Komiti i le taeao nei, o lea foi e le i faitauina i se tulaga foi lea auiliili, ia atonu o lena ua vave le faitau a outou Afioga i le Lipoti, ae o le taua o le toe Teuteuga lea, ona pe manatua foi, o le Tulafono Toe Teuteuga muamua ua uma ona pasia o lea e faapea ai, e mafai ia i latou o i luga o le Lola o Tagata Palota Taitoatasi ona avea automatically, a, ma se tasi o tagata palota o Lola o itumalo ia tu taulaga e lua. Ae peitai la lau Afioga i le Fofoga Fetalai ma le mamalu o le Palemene, ona o le puipui lena o le Tulafono o le a i ai ni tagata e nonofo i fanua i tua atu o itumalo ua faatulagaina mo nofoa ia tu taulaga. O le Toe Teuteuga la lea e tamau ai, a fia avea le tagata ma sui tauva, e tatau lava ona alaala i totonu o tuaoi o itumalo ia e lua ua faatulagaina.

Ia pei lau Afioga i le Fofoga Fetalai, o ala o mea sa uia, sa avatu e le Komiti ma toe faaoo atu i le Kapeneta e silasila i ai le Kapeneta ma toe faafoi mai i le taimi puupuu lava lea sa fai ai le iloiloga a le Komiti, ia ma o lea ua aumai ai le Toe Teuteuga i luma o le Fono Faitulafono.

Ia o se faamatalaga lea ma le faaaloalo lava.

**FOFOGA FETALAI:** Ia se i tulai mai le sui usufono mamalu mo Faleata Sisifo.

**Tofa LEALAIPEPE RIMONI AIAFI (Faleata Sisifo):** Faafetai mo le avanoa, faafetai foi i le Afioga i le Taitaifono mo le Lipoti pei ona tuuina mai ma suiga talafeagai. Ae ou te fia fesili i le vaega tonu lea lau Afioga i uiga agavaa o tagata palota taitoatasi, o lea ua faamanino mai i le Tulafono ia sui tauva, atoa ai ma tagata taitoatasi palota. O le mea la lea e fia maua se malamalamaaga i lau Afioga i le Taitaifono po o le Tamaitai Minisita, ona o lea e le i faia se Teuteuga o le Lola a le Individual Roll lea e faaoga i le taimi nei, pe faapefea? Aua i lou talitonuga, e le tatau ona toe faaogaina le Lola lea, ona o lea ua le o toe i ai ni sui o palota taitoatasi, o lea foi e manino le Tulafono faavae ia agavaa e agavaa ai tagata i totonu o le Lola lea, aua o lea a fai le sui fou o le taulaga, o lona uiga e fai foi le Lola o le taulaga. E le afaina le tagata palota taitoatasi o lo o nofo i totonu o le boundary, a o tagata e i tua ane o le boundary, e le tatau ona toe i ai i totonu o le Lola lea pe mafai foi ona toe palota i sui o le taulaga ona o le a feteenai ai ma le finagalo o le Matagaluega e faamalosi ai le palota o le tagata lava i le mea o lo o alaala ma afio ai. O le mea lea e fia maua ai se faamalamalamaaga lau Afioga, faafetai.

**FOFOGA FETALAI:** Malo. Ua maua le finagalo o le sui usufono, lau Afioga i le Taitaifono e te fia saunoa?

**Afioga Hon LEAUPEPE TOLEAFOA APULU FAAFISI:** Malo faafetai. O le faapupulaga o le itu lea o le toe pau lena o le faamoemoe e palota ai i latou ia e i tua atu o le tuaoi, ina ia palota i le Palota Tele lea o lo o

lumanai, a maea le palota 2016, ia o i ina la o le a le toe agavaa ai i latou ia i tua atu o tuaoi ia e toe palota i le tulaga o le Lola lea e i totonu o tuaoi ia faa- taulaga. E pei o le tali atu lea, aua o lea foi ua aumai le vaega o le Tulafono e tuu ai le malosiaga i Lana Afioga Mamalu, O Le Ao o le Malo e faia ai Tulafono Faatonu Tau Soloaiga e ala i le fautuaga a le Kapeneta. O mea uma ia o le a silasila mulimuli ane i ai.

Ma lou faaaloalo, faafetai.

**Tofa LEALAILEPULE RIMONI AIAFI:** Lau Afioga i le Fofoga Fetalai....

**FOFOGA FETALAI:** Ia.

**Tofa LEALAILEPULE RIMONI AIAFI:** O lona lua lau Afioga. E pei o lea ua toe feteenai la le Komiti i le vala lea, aua i lou talitonuga, o lona uiga la i le saunoaga a le Afioga i le sui usufono mamalu, o le a lua Lola e fai ai le palota lea, o le Lola a le Individual ma le Lola a le Area?

**FOFOGA FETALAI:** Se i ou fesoasoani atu le sui usufono mo Faleata Sisifo.

**Tofa LEALAILEPULE RIMONI AIAFI:** Lelei.

**FOFOGA FETALAI:** E tatau ona ou faamanatu atu leaga o le tatou Komiti lea sa i ai le Lipoti lea, o le tatou manulauti ma le silasila mamao, ona o le fetuunaiga po o fea o le a o i ai tagata nei e i totonu o le Lola lea, a o lea o le a tosi le tuaoi lea o le a tatou sagai atu i le aso ona fai lea o le faaiuga, o le taimi mulimuli lenei ona faatulaga loa lea, o ē e i fafo atu o le Boundary, agai loa latou i itumalo ua faasaga sao i ai le Boundary, ae tuu mai le tulaga ona o le tulaga e faigata tele ona toe fetuunai i le taimi lenei o le mea foi lena sa i ai le tatou Komiti, ne i te i ua le manatua e lau Afioga, ae o le agaga lena o lea e taumafai mai ai, aua ne i o tatou valetuulima i latou o lea e....tulou le taua o le itumalo, o le itumalo o Aleisa, ia ma nai nuu na o lea o le a le aafia i le a le Faaiuga a le Palemene i le aso lenei, ia o latou la na e faigata tele ona toe fetuunai, ae a maea le tatou faiga palota nei, ia ona agai loa lea o latou i le mea e agai i ai, ae faamamalu le Boundary o lea o le a pasia i le aso.

**Tofa LEALAILEPULE RIMONI AIAFI:** Lau Afioga, faafetai mo le faamalamalamaga, leai o lea ou te manatua lelei, manatua foi e eseese o tatou finagalo i le mataupu lea. E faigofie lava le fesili lau Afioga, ua le o toe i ai ni sui Individual, e le o aumaia se suiga i le Tulafono e sui ai e atagia ai suiga ia. O le fesili la lea e faigofie lau Afioga, e fia la Lola lea o le a faaoga, ae faapefea ona transfer mai le Individual i totonu o le Urban? Aua e tasi le Lola e faaoga i le palota, na o le Lola o le Urban. E faapefea la ona fetuunai aua o le a tele le faaletonu, a ua le toe i ai ni sui o le Individual, e le tatau foi la ona toe i ai se latou Lola e faaogaina?

**FOFOGA FETALAI:** O lea ua ou maua lou finagalo le sui usufono mo Faleata Sisifo. Ia malie ia, ou te talitonu e malamalama le tatou mataupu pe a tatou o i le auala faigofie.

**Afioga MAUALAIVAO PAT AH HIM (Palota Taitoatasi):** Lau Afioga i le Fofoga Fetalai.....

**FOFOGA FETALAI:** Malie se tasi o sui usufono mo Palota Taitoatasi, Afioga Maualaivao Pat Ah Him, se i tuu atu muamua le avanoa i le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai i lau Afioga i le Fofoga Fetalai. O le Lola lea e taua lea sa i Palota Taitoatasi, o le aiatatau a le tagata e fai ai lana filifiliga. O lona uiga, e tatau ona filifili, pe nofo i le Lola i tua atu o le Boundary, pe sau i totonu o le Boundary e palota ai, o le mea muamua lea.

Lau Afioga i le Fofoga Fetalai, o le mea lona lua, e tatau foi ona malamalama le aualii ia i tua atu o le tuaoi e le toe aoga le faipule lea i o latou manaoga, aua a sau i i, o le tali i ai, o la e i ai le tama o le itumalo i tua atu o outou, e tatau ona silafia e tagata nei ia le mea e ono oo i ai.

O lona lua lau Afioga, e manaia le Teuteuga lea na saunoa i ai le Afioga i le Tamaitai Minisita i le tulaga lea i le eligibility o candidates i le urban seats. O lau fesili la, a sau la le tagata i Niu Sila e nofo i i lona fanua tumaoti i le 6 masina, e entitle la i ai? Afai la o le a fai le Tulafono lea e fai ai le exemption lea ou te matuai, ua discriminate lava e tatou i a tatou tulafono, ma lou faaaloalo lava.

**Afioga Hon Palusalua Faapo II (Taitai o le Itu Agai):** Lau Afioga i le Fofoga Fetalai.....

**FOFOGA FETALAI:** Malie lau Afioga i le Taitai o le Itu Agai, o lea o le a....ona avatu loa lea o le avanoa. Tulai mai se tasi o sui usufono mo Palota Taitoatasi, Afioga Maualaivao Pat Ah Him.

**Afioga MAUALAIVAO PAT AH HIM:** Faafetai mo le avanoa i lau Afioga i le Fofoga Fetalai, faamalo foi le faatautaiina o le tatou Fonotaga ma lenei mataupu. Ou te talitonu ona o lea ua lotea le mataupu leni o le Palota Taitoatasi. E tulai atu lava ma le faaaloalo ma le ava tele i lau Afioga i le Taitaifono faapea le paia o le Maota i sui usufono mamalu, le Taitai o le Malo. O lo o faafogafoga mai le itumalo leni o Palota Taitoatasi, ne i te i ua faapea latou ai o le gagana lea e i totonu o le Maota ua leai ni sui usufono mo Palota Taitoatasi, a o lea lava e faaauau pea ia sui usufono mo Palota Taitoatasi. E le i maea ona tagofia le suiga o le Faavae ona faapena lea ona amanaia ma aloaia le tuueseeseina o vaega ia le paia o itumalo o tagata Palota Taitoatasi. Ma ou te talitonu foi lau Afioga i le Fofoga Fetalai, ona ua ou vave tulai atu lava ma le faaaloalo tele ona o lo o faafogafoga mai i latou uma o lo o i totonu o leni Lola, ona e faapea e le tatau ona toe faaaogaina, ia o se gagana e pei e le o atoatoa ona se i silasila i ai le.....

**Tofa Lealailepule Rimoni Aiafi:** Lau Afioga i le Fofoga Fetalai, faamolemole o se mea e fia faasao e tusa ai i le saunoaga a le sui usufono ona o lea e pei e agai mai.

**FOFOGA FETALAI:** Ia o le a uma ona avatu lea o le avanoa, se i usi mai po o le a tonu le mea la e atugalu ai, o lea ua ou maua lona.....

**Tofa Lealailepule Rimoni Aiafi:** O, ia ona aumai lea o le avanoa lau Afioga? Faafetai lava.

**Afioga MAUALAIVAO PAT AH HIM:** Ia faafetai lava, faamalo foi i le sui usufono, leai e le o se faataumatatao, o le lagona lava ia ne i te i ua sese se upu, a o lau faalogo, sa faapea mai e le tatau ona faaaogaina le Lola lea. Peitai ane ua maea ona.....i se matou iloa vaivai, o le Lola lea o lea ua agai uma mai ma otometi lava le omai i totonu o le Lola lea o nuu tu taulaga, ona o le tulaga lea, ua leai se itumalo, ioe. O fea la o le a agai i ai? Pei ona saunoa lau Afioga i le Fofoga Fetalai i le tulaga moni lea. Na ona ou faapena atu i le paia o le tatou Maota, ae le o se mea e afaina ai se finagalo, na o le faooloolomaa atu, o le tulaga lea o lo o i ai pea sui usufono o tagata palota taitoatasi, ma le faaloalo tele lau Afioga i le Fofoga Fetalai.

**FOFOGA FETALAI:** Malo, o lea ua maua lou finagalo.

**Tofa Lealailepule Rimoni Aiafi:** Faafetai lava i lau Afioga. E faamalulu atu foi i le Afioga i se tasi o sui usufono mamalu mo Palota Taitoatasi, o lau tala lea e fai atu, e le tatau ona toe faaaogaina le Lola, e ese le Lola, ese le tagata palota. O le tagata palota ia e faaaoga lava, o le latou aiatatau lea, a o le Lola, e le tatau ona toe faaaogaina ona ua leai se tagata e palota i ai, a o tagata palota ia, leai e faaaoga o la e i ai, o le la e exist, o le faataitaiga lau Afioga, afai o le finagalo lea o le Matagaluega, o lona uiga foi la, tuu le avanoa ia Safata po o Aana, palota latou i lenei taimi se i sui la i se isi Paeaiga pe afai o lena.

**FOFOGA FETALAI:** O lea ua maua lou finagalo le sui usufono mo Faleata Sisifo.

**Tofa Lealailepule Rimoni Aiafi:** E tatau ona tasi le Tulafono mo tatou uma.

**FOFOGA FETALAI:** Leala.....

**Afioga Hon Fiamē Naomi Mataafa:** Lau Afioga o le mea e fia faasao.

**FOFOGA FETALAI:** Ia se i tulai mai.

**Afioga Hon Fiamē Naomi Mataafa:** O le mataupu lea e saunoa i ai le sui usufono, o le mataupu ua uma ona aiaia i lalo o le Tulafono lea na tatou pasia i le Teuteuga muamua, ma i lou taofi i tatou Tulafono Tumau, ua uma, ma e o le taimi lenei o lea lava o lo o i ai Lola o tagata Palota Taitoatasi aua o lea e alaala mai ia sui usufono e toalua o le Au Palota lena, ae i lalo o aiaiga o le tatou Tulafono ua maea ona tatou pasia, e i ai le transition\_i le faaiuga o le Paeaiga lenei o le a transit ese mai ai loa ia le Lola lea o Palota o Tagata Taitoatasi, ae amata ona aloaia ia Lola o itumalo tu taulaga. Ae o lea o lo o i ai le avanoa ia i latou o lo o i totonu o le Lola o Palota Taitoatasi i le taimi



lenei as a transitional provision i le mea foi lea sa saunoa i ai lau Afioga ina ia le tiaia se vaega o tagata palota e mafai ai ona fai ai le filifiliga a le tagata palota o le Lola Taitoatasi, pe alu loa ia, e palota i le mea lea e nofo ai, pe palota i totonu o tuaoi o itumalo tu taulaga, pe a faapea ona ia maua ia agavaa e mafai ai ona avea o ia o se tagata palota, ia ma se tagata tauva mo le tofi faipule.

O le faamalamalama lenei ma le faasaoga faamolemole lau Afioga.

**FOFOGA FETALAI:** Malo faafetai.

**Tofa Lealailepule Rimoni Aiafi:** Lau Afioga i le Fofoga Fetalai, leai o lea ua ou maua, faafetai i lau Afioga i le Tamaitai Minisita.

**FOFOGA FETALAI:** Malie le sui usufono mo Faleata Sisifo, o lea ua ou faamalulu atu, malie lau Afioga i le sui usufono mamalu, o lea ua manino ma malamalama le mea lea sa e atugalua i ai. O lea ua malamalama le folasaga a le Tamaitai Minisita, o lea foi sa ou taumafai atu e faamalamalama le mataupu. O lea ua tatou avea le avanoa e aua ai nei i o tatou tuulafoaia i latou sa i le Lola lea, fai la e le tagata lana faaiuga pei ona saunoa le sui usufono mamalu mo Palauli le Falefa, you make your own decision, on your own right to vote, pe e te toe foi mai i i for the last time, last time, e le toe faia e uma loa, uma loa. Ona faasolo laia o le faatulagaga po o le a le faaiuga o le a tatou agai i ai i le aso, faamamalu boundaries, ona pule lea o le tagata, po o lona residency, ia po o le sau lea i i. E manatu e manino o le a le.....

**Tofa Lealailepule Rimoni Aiafi:** Lau Afioga e faamalulu atu lava i lau Afioga, e tasi lava le fesili lea e tau faamanino, e fia la Lola lea o le a fai ai palota taitoatasi?

**FOFOGA FETALAI:** E tasi le Lola. O le Lola tuai lea o le a faamamalu, one Roll, o le Lola tuai lea o le a faamamalu pe a maea nei ona faaulufale le Urban Seats, a o le taimi lenei, o lea e tatou te i luga i le Independent Seats. E le i pasia le tatou Tulafono e fesui ai aloaia ai mea.

**Tofa Lealailepule Rimoni Aiafi:** Lau Afioga e faamalulu atu, e lua Lola a le Urban Seats, o le Urban West ma le Urban East.

**FOFOGA FETALAI:** Ia e lua itumalo mavae lea o le a fai ai ae tasi lava le Lola, ona mavaevae laia o palota i itumalo o le a mavaevae i ai tulaga o le aso.

Le sui usufono mo Faleata Sisifo ua malamalama le mataupu?

**Tofa Lealailepule Rimoni Aiafi:** E faamalulu i lau Afioga, o lea la ua matua confusion atoa le mea. O lea sa feoloolo le mea sa i ai, a o le mea lea ua e matuai faasese atoa le mea lea, e faamalulu atu.

**FOFOGA FETALAI:** Leala, you have to obey the Speaker. Alaala i lalo o lea ua manino le mataupu, Palu, e te disobey foi oe o le a.....

Ia se i tulai mai lau Afioga i le Taitai o le Itu Agai.

**Afioga Hon Palusalue Faapo II:** Lau Afioga i le Fofoga Fetalai, o le matua tele o le nunumi o le mea ua i ai nei. O ai e mafua ai, o ai e mafua ai le nunumi o le aumai o tatou Tulafono iinei, e le gata o le tou fetotoai o lena itu, a o lenei e tuufesili atu lenei itu. O lou talitonuga o le Tulafono lenei, ua mafua lava ona fetotoai o le aumaiga o le Tulafono e lau Afioga i le Palemia ma le Minisita lea ua fetotoai, e le gata o le fetotoai o lena itu, a o lea e tuufesili atu le itu lenei, ina ia fai le mea talafeagai ae aua le....Afaia ua fou ia nofoa, e tataua ona silasila i le Lola ia fai le mea amiotonu, ae le o le fai o na mea o transition ea po o a ea?

**FOFOGA FETALAI:** Se i ou faamalamalama atu le mataupu lea.

**Afioga Hon Palusalue Faapo II:** Ma o le mea e fia faasao lau Afioga, e le i ai se iuga a le tatou Komiti, a mea e tuu le avanoa i mea ia, e eseese ai la tatou.

**FOFOGA FETALAI:** E faamalulu atu i lau Afioga i le Taitai o le Itu Agai, o le a le tulituliaupu le mea lea, aua a ou tapa nei e aumai Hansard o le tatou Fono ona iloa lea o le mea lea na oo i ai le tatou talanoaga. Ia outou finagalo malilie, na ala ona lagalaga le mataupu, o le saunoaga a le sui usufono mo Faleata Sisifo lea na tee ai le finagalo o se tasi o sui usufono mo Palota Taitoatasi, Afioga Maualaivao Pat Ah Him, o lea ou te faasaoa o lea foi ua saunoa mai ia, ia o ai ia o le a....? Ua uma le tatou fasiga gata na fai i le falefono tuai, a o lea se i silasila tuu pea le avanoa se i tatou oo i le fesuiaiga, tuu ia le transition ona o lena e tou te le fiafia i le transition, le fesuiaiga o le a pasi ai le Lola a palota taitoatasi i le palota tu taulaga. Ae silasila outou i le avanoa lea e ave, filifili le tagata la e i Aleisa po o fea e alu i ai, decide, pe nofo i o, alu ifo i le sui usufono mo Sagaga le Falefa e palota ai, pe sau i i le mea lea e i ai nisi o sui usufono mo Palota Taitoatasi, Afioga Maualaivao Pat Ah Him ma Papaliitele Niko Lee Hang, ona malamalama lea, ua iu le mataupu.

Tulai mai se tasi o sui usufono mo Palota Taitoatasi, Susuga Hon Papaliitele Niko Lee Hang.

**Susuga Hon PAPALIITELE NIKO LEE HANG (Palota Taitoatasi):** Ia faafetai atu i lau Afioga i le Fofoga Fetalai mo le avanoa, ia e le fia gugu foi Sakaria ona o lea e aafia lou nei sui usufono ona o le aafia o lo o i ai maua nofoa ma le Afioga Maualaivao Pat Ah Him.

Ae na ona ou tulai atu lau Afioga i le Fofoga Fetalai e toe faamanatu atu i saunoaga ia e tulai mai e faapea, o lea ua talatalanoa eligibilities o le.....a o le mea lea ou te talitonu e tataua ona talanoa nei o mea ia o boundaries ia ma pasia loa le tatou Tulafono. O le tulaga foi lea e fesiligia ai e lua Lola, e sese lea mau, o lea lava e le i pasia le Tulafono e taatia mai le Urban Seat i lona tulaga aloaia, o le taimi nei na o le Individual Vote Rolls vaeane le.....se i vagana la ua pasia nei le Tulafono, ia ona tasi loa lea o le Lola o le a transfer tagata ia i le Lola o le Taulaga, leaga o lea e faafogafoga mai le mamalu o le Au Palota Taitoatasi, o lea e confuse foi latou i le tulaga lea e i ai maua itumalo, ia na faamalulu i ai e onosai mai, o nei lava e pasia ai le Tulafono, ia ona maua loa lea o le tonu ma le sao o le mea e agai i ai. O le saunoaga foi lea a le Afioga i le sui usufono mo Palauli le Falefa i le Tulafono, o la e

tumau lava le tatou Tulafono tuai, e tolu lava tausaga e tatau ona sau ai le tagata mai fafo e alaala iinei faatoa mafai ona alu i le palota, a o le avanoa lea e tuu mai i le.....e ese, o tagata ua leva ona iinei a o le 6 masina e nofo ai i se fanua umia saoloto, ia ona agavaa lea. O le eseese lona lau Afioga, ma lou faaaloalo lava.

**FOFOGA FETALAI:** Malo faafetai fesoasoani mai ua atili ai ona malamalama le mataupu.

**Afioga Maualaivao Pat Ah Him:** Lau Afioga i le Fofoga Fetalai.....

**FOFOGA FETALAI:** Ia se tasi o sui usufono mo Palota Taitoatasi, Afioga Maualaivao Pat Ah Him, pe i ai se isi mea?

**Afioga Maualaivao Pat Ah Him:** Ioe na o sina mea laitiiti lava.

**FOFOGA FETALAI:** Ia, e avatu pea le avanoa o le ava tele atu, tulai mai.

**Afioga Maualaivao Pat Ah Him:** Leai, ona o lou lagona o lo o faafogafoga mai ia itumalo nei tai pei o Aele, Aleisa ma nisi o nuu o lo o toatele ai le.....ua saunoa lau Afioga e tauvalaau atu, ia pule outou, ia a o le gagana lona lea sa matou avea i ai. A o lea o le a ou faamatala i ai latou, tutumau pea, o lea lava e tatou te o lava i luga o le vaa. Ioe, ma le faaaloalo lava, faafetai.

**FOFOGA FETALAI:** Ia.

**Tofa Motuopuaa Uifagasa Aisoli Vaai (Vaisigano Nu. 2):** Lau Afioga i le Fofoga Fetalai.....

**FOFOGA FETALAI:** Ia se i tulai mai le sui usufono mo Vaisigano Nu. 2.

**Tofa MOTUOPUAA UIFAGASA AISOLI VAAI:** Ia faafetai mo le avanoa i lau Afioga. Sa ou fia tautala foi i le mea lea na finau ai le sui usufono mo Faleata Sisifo, ia ae tuu ia, ou te iloa lava e sao le sui usufono mo Faleata Sisifo, ia ui i lea, ia o le a fai atu ia lau...na o sina tamai fesili lava.

**FOFOGA FETALAI:** Ia saunoa le sui usufono mamalu.

**Tofa MOTUOPUAA UIFAGASA AISOLI VAAI:** O mea nei o Tulafono, e fai e tatou Tulafono, ae a o atu i taimi e fai faamasinoga i totonu o faamasinoga, ia ona taaalo loa lea o Loia e faauiga upu. Pei la o le mea lea o lea e fesili atu ai i le Taitaifono, o le mea lea o le Residence on Freehold Land, aua e mafai lava ona alu atu le isi faapea, ia o le a ou alu moni i i Faleata East i le Urban po o Faleata West, ae o le a ou alu ou te nofo i se hotel e mau totogi ai i se 6 masina on Freehold Land, ua e vaai la i ai i le... a? E le o mafaufau lava i ai le Komiti i nei mea, ae a oo ina oo i totonu o Tulafono ma sau le candidate ia ona alu lea o le isi sue. O le mea lea lau Afioga i le Taitaifono, o le residence la lea on your freehold land, o lou lava

fanua po o se fanua o se isi, pe e te alu atu foi e te nofo i sou aiga o nofo i luga o le freehold land, o mea faapena?

Ma lau fesili mulimuli, o la outou Lipoti, o lea ou te vaai atu na o Maualaivao lava e le o saini i la outou Lipoti, pe i ai se auala ua le saini ai Maualaivao i la outou Lipoti. Ma le faaaloalo.

**FOFOGA FETALAI:** Ia Mr Chairman, tulai mai lau Afioga.

**Afioga Hon LEAUPEPE TOLEAFOA APULU FAAFISI:** Masalo e suifefiloi le malie o finagalo faaalua. Ia ou te faamalulu atu foi i lau Afioga i le Fofoga Fetalai, e tau ma se toa ma lau Afioga, o avanoa lava nei sa tuuina atu i le Komiti, ia sa faapea ai e autovaa atu i ai sui usufono mamalu o le Palemene e fetufaai ai ma faamalamalama itu uma ia, ae ui i lea, ia ou te faamalosia i le tofa i lau Afioga, ona e atagia i finagalo o sui usufono, e toso mai le Tulafono i le mea la e manatu ia e faaliliu ai e tusa ai o lona manao. Ia ailoga o se faiga amiotonu lea tulaga, ioe, o le finagalo lava lea o le tagata a usufono lava ia le sui faipule, ae le faapea o le a taai faafala ai le tapenaga a le Malo ma tapenaga a Matagaluega o la e fitoitonu i ai le tomai faapitoa i le faatinoga o galuega nei, ia ona aumai lea o le manatu faa-faipule e manao ia taai ia ioe mai lau Afioga o le mea lena e sao.

A o lea mea pei ona saunoa mai le sui usufono mo Vaisigano Nu. 2, ia e leai e fai foi o le tagata umia saoloto le fanua, ae i ai foi le isi ituaiga lisi foi lea e lease to own, e nofo i le lease foi lele o la e mativa, se i i ai se tupe ona maua lea, ia e uso uma lava mea na, e alu alu lava liu eleele tumaoti. Ia pei e faapena tuu le avanoa i nai o tatou tagata foi lele....ae 25 tausaga talu ai, a o faafofoga mai Samoa, lau Afioga i le Fofoga Fetalai, masalo pe na o se toa....e le toatele ni tagata sa latou umia ni fanua, e leai, sa tele lava i le aumaumea, ioe, ae a aso nei? Ua faamatuu atu e le Malo ana eleele e fia selau afe eka. O le a le mea la ua i ai? O la ua tofu eleele Samoa. Aisea? Atinae a le Malo, faamatuu e le Malo ia tutusa le soifua lelei o le tagata. O le mea lena e tatou te fuafua, e le na o tatou nei, e tatou te le faavavau ai i i, ae mo le lumanai. Ia o le tali atu lea, faafetai.

**FOFOGA FETALAI:** Malo. Ia.....

**Tofa MOTUOPUAA UIFAGASA AISOLI VAAI:** Lau Afioga i le Fofoga Fetalai, o lau fesili na ou fia malamalama, aua o mo technical issues lea ou te alu atu ai, ia a o lea ua saunoa i eleele e fia selau afe, ia na ta apply foi ta ita i ni eleele o si o ta nuu, ia e leai lava se mea na maua, ma le faaaloalo.

**FOFOGA FETALAI:** Malo. O lea tatou te i le vaa lava lea e tasi e le na o lau Afioga, ae le uma le fai aso o le Alii, o la o le a vaevae Tanumalala ma isi nuu na, ona tali laia o lagi o Aopo.

**Afioga Tufuga Gafualeata Faitua (Vaisigano Nu. 1):** Lau Afioga i le Fofoga Fetalai.....

**FOFOGA FETALAI:** Malie le sui usufono mamalu.....

**Afioga Tufuga Gafoaleata Faitua:** E fia fesili i le....O le Lipoti a le Komiti e fia fesili ai faamolemole i le vaega lea 3.2 ae le i....o le....

**FOFOGA FETALAI:** Ua oo i le mea lena le sui usufono mo Vaisigano Nu. 1?

**Afioga Tufuga Gafoaleata Faitua:** Leai o le mea lea e sau ai ou te fia fesili ai, fai mai o le sailiiliga a le Komiti, ua maitauina ai le talafeagai o le taimi e pei ona faatulagaina ona vaai....

**FOFOGA FETALAI:** Ou te faamalulu atu i le sui usufono mamalu mo Vaisigano Nu. 1, o lea ua e....

**Afioga Tufuga Gafoaleata Faitua:** Agavaa ai e lesitala ma tauva i le itumalo, e 6 masina.

**FOFOGA FETALAI:** Malie lau Afioga i le sui usufono mamalu o lea ua pasia le tatou lafo, e faamalulu atu ai ua tautuauega lou fesili mai o lea ua....e le mafai ona toe foi i tua le tatou galuega.

*Faamaonia le Teuteuga.*

*Faamaonia le Fuaiupu 3 e pei ona Teuteuina.*

**FUAIUPU 4: Ua teuteuina le fuaiupu 45A.**

*Faamaonia.*

**FUAIUPU 5: Ua teuteuina le Tulafono o Itumalo Faa-Alaalafaga.**

**FOFOGA FETALAI:** O lo o i ai le Teuteuga a le Komiti i le Fuaiupu 5. Tulai mai lau Afioga i le Taitaifono.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai ou te faatu le Teuteuga i le Fuaiupu 5 e faapea:

**“TEUTEUGA:**

**5. Ua teuteuina le Tulafono o Itumalo Faa-Alaalafaga-** I totonu o le Faamatalaga i le Tulafono o Itumalo Faa-Alaalafaga 1963, mo le Vaega 2, e faapea:

**“VAEGA 2- TUAOI MO ITUMALO O NUU I LE TAULAGA**

## ITUMALO O NUU I LE TAULAGA I SASAE

*O le vaega eleele uma (e ese mai ai i lo fanua faaleaganuu)  
lea o lo o aofia i tuaoi e faapenei:*

**E amata mai i le laina o lo o tuaoi ai Vaimauga i Sasae  
ma Anoamaa i Sisifo seia oo mai i le laina o lo o tuaoi ai  
Vaimauga i Sisifo ma Faleata i Sasae.**

## ITUMALO O NUU I LE TAULAGA I SISIFO

*O le vaega eleele uma (e ese mai ai i lo fanua faaleaganuu)  
lea o lo o aofia i tuaoi e faapenei:*

**E amata mai i le laina e tuaoi ai Vaimauga i Sisifo ma  
Faleata i Sasae, seia oo atu i le laina o lo o tuaoi ai Faleata  
i Sisifo ma Sagaga le Falefa.”**

Ma lou faaaloalo.

**FOFOGA FETALAI:** Ia se i tulai mai lau Afioga i le Minisita mo  
Faamasinoga ma Pulega tau Faamasinoga.

**Afioga Hon FIAME NAOMI MATAAFA:** Lau Afioga i le Fofoga  
Fetalai, atonu o le Fuaiupu tonu lea sa ou tulai atu ai i le amataga o le  
faataatia mai o le Lipoti a le Komiti, ma ou faatalosagaina ai ina ia noatia se  
faaiuga a le Maota i le fai lea fuafua i le iloiloga o le Lipoti e le Fono Aoa.

Ma e ou te manatu o lea ua faatino ia le Iloiloga, ma e ou te tautala i ai ona o  
le Fuaiupu lea, na o le pau lava lea o le Fuaiupu lea o lo o i ai le toa i le  
faagasologa o le tatou Tulafono. Ma ou te faafetai atu i le Komiti i le  
faavavevave ma le tali mai i le mau na tuuina atu a le Maota e toe foi mai le  
latou Lipoti i le tatou Fonotaga lenei.

Lau Afioga i le Fofoga Fetalai, atonu la o lea ua tatou manino i le toa lea  
tatou te i ai, aua o le Tulafono o lo o faatulaga atu, o lo o tuua ai a tatou tuaoi  
o itumalo tu taulaga i luga o tuaoi faaitumalo mavae po o Itumalo Faa-  
Alaalafaga o le Vaimauga Sisifo ma Faleata Sasae. O le finagalo o le Komiti  
o lea ua faaalua i le latou Lipoti ua tala atu i tua ia tuaoi ia, o lona uiga, o le  
tasi o itumalo o tu taulaga o le a aofia ai ia Itumalo Faa-Alaalafaga, o le  
Vaimauga Sasae ma le Vaimauga Sisifo, tasi lena itumalo tu taulaga, ia o le  
isi itumalo tu taulaga o le a i ai Faleata Sasae ma Faleata Sisifo.

Lau Afioga i le Fofoga Fetalai, o lea sa ou tulai atu i le Teuteuga o le  
Fuaiupu e 3, ma e faamanino atu sa uia lava ala o mea ma tulaga masani i le  
toe Teuteuga ua aumai ai i le tatou Tulafono lenei, ma e na pasia foi e le  
Kapeneta ma ua auaufaatasi i ai ia se finagalo ma le Komiti. Ae peitai, o lea  
ua maitauina i le Lipoti lenei a le Komiti, ia ma e faamalulu atu ai o lea sa fai  
sina faitau faatopetope aua o le Lipoti atoa lea faatoa faataatia ananei i le  
taeao, ia ma ia malie foi lau Afioga i le Fofoga Fetalai ma le mamalu o le  
Palemene, a umi foi sa matou faamatalaga, ia e ao ina umi ona o lea lava ua  
taatia mai le finagalo o le Komiti, ae ao foi ona fola atu le faamoemoe o le  
Malo sa faataatia atu ai le tatou Tulafono.

Lau Afioga i le Fofoga Fetalai, o le faagasologa lenei o le Toe Teuteuga  
lona lua, o le soosoo mai lava lea ma le Teuteuga muamua ua uma ona tatou

pasia. Ia ma i lau Afioga i le Fofoga Fetalai, ou te le fia faia se faamatalaga e toe lagalaga ai foi finagalo o le Maota ia pe toatamai ai foi lau Afioga i le Fofoga Fetalai, aua o lea sa i ai pefea i le tapenaga foi a le Komiti sa aumai muamua i ai ia lenei Tulafono, lea sa Taitaifono ai lau Afioga i le Fofoga Fetalai. E i ai foi i totonu o le Komiti lea a le tatou Palemene, ia le Sui Fofoga Fetalai, le Afioga i le Palemia, le Taitai o le Itu Agai, ia ma isi sui usufono o le Palemene. Ia o lea lava sa manino nisi o feteenaiga o aia sa tulai mai ia ma sa saunoa ai foi le Taitai o le Malo e tulai ese mai ia, ona e faigata o le Tulafono e tapena mai e le Kapeneta, ae peitai, ia o lea o lo o saofai ai ia i totonu o le Komiti lea. Ma o lea sa tofi mai i ai isi Minisita o le Kapeneta mai lea taimi i lea taimi e fesoasoani i le tatou Komiti.

Lau Afioga i le Fofoga Fetalai, sa i ai foi le tatou feeseeseaiga ona o Teuteuga a le Komiti, ma e ou te fia tautala i le auala e fai ai a tatou Teuteuga. O le tatou Tulafono Tumau e tuuina atu ai ia tatou Tulafono po o tatou Lipoti a tatou Komiti, o lea o lo o faapea mai le tatou Tulafono Standing Orders, e i ai i le Komiti le power na te faaalua ai sona taofi.

Lau Afioga i le Fofoga Fetalai, e le o le aumaia o le Toe Teuteuga Tususia Faaletulafono o le Text, o le Draft o le Tulafono, e le o le aumaia o le mea lena a le Komiti e faaali ai lo latou taofi, aua o le tusia o tatou Tulafono, o le matafaioi lena a le Loia Sili ma aumai i luma o le Kapeneta ma faapena ona faasolo mai ai a tatou Tulafono i luma o le Palemene.

O le mea la lena o lea ou te talosaga atu ai lau Afioga i ala o mea ma a tatou Teuteuga, aua o lea ua taatia mai i le Lipoti a le Komiti se Teuteuga ua foliga mai o se Draft Bill, ae peitai, e le o se Teuteuga lea na uia ala masani e avatu i le Kapeneta ma toe faafoi mai ai ma tususia e le Loia Sili a tatou Tulafono, o le ala lena o mea. Ae i le tino lava o le Toe Teuteuga o lo o aumai, o faaupuga o lo o i ai, e le o talafeagai faaletulafono, le talafeagai faaletulafono ia tuaoi ia o lo o tusi mai ai i i. Aua o le tosiina o laina e pei ona aumai i le Toe Teuteuga lea, o laina i luga o pepa. Ae peitai, e pei foi ona aumai ia Toe Teuteuga e le Malo o tuaoi o itumalo tu taulaga o lo o faailoga mai ai lava ia pine po o nofoaga faapitoa e mafai ona faasolo ai ia le faailogaina o itumalo tu taulaga.

**Afioga Hon Palusalua Faapo II:** Lau Afioga i le Fofoga Fetalai, o se mea e fia malamalama.

**FOFOGA FETALAI:** Malie lau Afioga i le Taitai o le Itu Agai, se i maea mai ona ou avatua lea o le avanoa.

**Afioga Hon FIAME NAOMI MATAAFA:** Lau Afioga.....

**FOFOGA FETALAI:** Saunoa, saunoa oe se i uma ona avatu lea o le finagalo o le.....

**Afioga Hon FIAME NAOMI MATAAFA:** Faafetai lava i lau Afioga.

**Afioga Hon Palusalua Faapo II:** Lau Afioga leaga o le mea e fia faamalamalama ai, leaga o lea o le a pasi ese ai le saunoaga a le Minisita.

**FOFOGA FETALAI:** Leai, aua e te popole ou te avatua le avanoa i le mea lea e te atugalua mai ai, o le a avatu le avanoa Palu.

**Afioga Hon FIAME NAOMI MATAAFA:** Ia, o le itu lea e tatalo atu ai i lau Afioga ma le mamalu o le tatou Palemene o le tatou uia o ala o mea tatou te tuliloa ai le amiotonu. E le paoina e le Tulafono se finagalo o le Komiti a ua i ai se finagalo o le Komiti latou te teena le Tulafono lea ua faataatia atu, aumai la, afai e lagolagoina e le Palemene ona faapena lea ona tatou fai ae tusi lava e le Loia Sili e ala i le faatonuga a le Malo, po o le avatu foi o le mau a le Palemene i le tatou Tulafono. E le mafai ona eseese tagata e tusia a tatou Tulafono, aemaise pe a faapea o se Tulafono na amatamea mai ai lava le tatou Faigamalo.

Lau Afioga i le Fofoga Fetalai o lau faitau faavavevave atu i le Lipoti a le Komiti o lea e faapea o le mamafa o molimau na oo mai i luma o le Komiti sa lagolagoina le tatala atu i tua faatele ia tuaoi o itumalo ia. Ma i lau vaai atu i ai i le faagasologa mai o molimau o lea lava o lo o aumai pe se 30+, a le o ni savali taitoatasi, o savali e avea ma sui o se nuu po o se itumalo. Ma lau Afioga i le Fofoga Fetalai, e leai se agaga o au nei e ou le Tulafono o lo o faagasolo e faapea e tauleagaina le mau o lo o aumai. Ae o lea ou te matauina i le Lipoti, muamua, o le mamafa o mau na aumai.

Lona lua, ua tauave e le Komiti se mau e faapea ua i ai faamaumauga a le Malo e pine ai pe faauigaina ai le upu lenei o le tu taulaga po o le urban ma latou tauaveina ai le pepa o faiga faavae a le Matagaluega o le PUMA. O lea e silafia uma e tatou o le PUMA lea e feagai ma le fuafuaina o atinae a le tatou atunuu.

Lau Afioga i le Fofoga Fetalai e le faoa e le Tulafono o Faiga Palota o lo o faataatia atu, fuafuaga alualu i luma a le Malo mo le atinae. E leai, aua o fuafuaga alualu i luma pei ona faataatia mai i le faiga faavae lea a le PUMA ua aumai e le Komiti e mafai lava ona amata atu nei, taeao, tausaga lea, le tausaga atu i ona tua, le lima tausaga, le sefulu tausaga. Lau Afioga i le Fofoga Fetalai ma le mamalu o le Palemene, o le tatou palota e fai ia Mati o le tausaga fou.

**FOFOGA FETALAI:** Ou te vaelupeina le saunoaga a le Minisita ona ua tatou taunuu i le tatou taimi malolo. O le a tatou alo e fai le malutaeao ona tatou toe talii mai lea faaauau le tatou Fonotaga.

Ou te faasilasila atu o le a faataatia ese Taulumaga a le Fono Aoa mo lana malologa masani o le taeao.

*Na faataatia ese Taulumaga a le Fono Aoa mo lana malologa masani i le itula e 10:45 i le taeao ma toe faaauau i le itula e 11:27.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoa Faitulafono. E i ai le agaga maualuga ua tatou taunuu mai i le tatou Vaega lona lua o le Fonotaga i lenei vaega o le aso. Ae talitonu le faamoemoe ua maea le taligasua ma le malu taeao ma e i ai le talitonuga ua faafoisia le malosi i le tino, le agaga ma le mafaufau e faaauau ai le tatou galuega, o lea ua maea ona faatulaga i lenei aso. E momoli atu ai le faafetai



tele i le paia ma le mamalu o le tatou Maota i le lavapapale, aemaise foi o le faatulagaga o a tatou polokalame e pei ona fuafuaina.

E faia le tatou malologa o lo o saunoa le Afioga i le Tamaitai Minisita mo Faamasinoga ma Pulega tau Faamasinoga. Ae ou te le i avatua le avanoa, ou te tapa le Afioga i le Palemia mo le lafo mo le fetuunaiga o tatou taimi o le tatou Galuega. Ma lou faaloalo lava.

## LAFO MO LE FAAAUAUINA O ITULA FONO

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ua sao i alo le faasiliga malosi o le tatou Maota nei ma ua maua foi le malosi faafouina e toe faaauau ai a tatou galuega. A ua ou tu atu lau Afioga e faatu le lafo, *Ina ia faaauau le tatou Fonotaga seia maea ona faia le tatou lauga pe a maea mea ia, ona fai ai lea o le tatou Lauga o le Tala o le Tupe, si tamai tala lava o le Tupe ai na o se lua minute.*

*Faaluaina e le Sui Palemia.*

*Na faamaonia le lafo.*

**FOFOGA FETALAI:** Lau Afioga i le Tamaitai Minisita, ou te manatu o lea ua taatia i le Maota lau saunoaga ma lau tuleiga. Na pau lava lea o le tatalo a le Fofoga Fetalai, ou te talitonu o lea ua maea i fatia ua sola ma le taimi ua alu le faatulai mai o lenei Tulafono Tau Faaofi ua talatala ma le la foi lou finagalo. E manatu foi ua maea ona tatou asa ia ogasami ua folasia i malae le tau faamalamalamaina o le finagalo o le Matagaluega ma lau Afioga i le Tamaitai Minisita.

O lenei la taeao, ou te manatu o lea ua saunoa le Afioga i le Taitaifono, o le Komiti sa faaiugafonoina e le Palemene e faia le latou galuega ma tulai mai le latou teuteuga i lenei taeao. Ona ou lagona lea ne i meaane ua toe agai e toe toso le laau felefele i le tulaga ua maea ona tatou faafogafoga foi i ai i le taimi ua sola, ae ava tele atu i lau Afioga i le Tamaitai Minisita, ona o le mau a lau Afioga ma le Matagaluega, o lea e tau faapulapula mai le mafuaaga na ala ai ona aumai le aiaiga o le Tulafono Tau Faaofi lea ua toe teuteu atu e le Taitaifono ma lana Komiti. A o le agaga, e tatalo atu o lea ua e faafogaga mai o lea ua faaopoopo a tatou Tulafono, ona o le manumanuga i le tatou taimi. O le talosaga a le Fofoga Fetalai, na ona lafo atu pea o le avanoa e faaauau mai ai le folasaga a lau Afioga, ae ou te maitau ua manino ma malamalama le Maota i le aano moni o le agaga o le Minisita ma le Matagaluega na tuuina mai ai le agaga o le Tulafono Tau Faaofi. Ae tatalo atu i le Minisita, o le tatou taimi lea ou te tatalo atu ai.

Ia se i tulai mai le Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, sa ou taumafai atu lava analeila, ae ua pai le Afioga i le Minisita i le tulaga i le Lipoti lenei a le Komiti na saunoa ai faapea o mea o draft mea nei, a o le tausiga o le mamalu o le Palemene lea e tulai atu ai. O Komiti nei ma a latou Lipoti, e fua i le omai a le atunuu e molimau ai, ma o le process lea e saunoa i

ai le Minisita e uma toe ave i le Kapeneta, ia e faailoga fesili foi i lou taofi lea mea. O le mea lea lau Afioga, o le tausiga o le mamalu, o le a la le aoga o le Komiti lenei a le Palemene, pe afai e fua le Lipoti ma le fautuaga a le Komiti i molimau a le atunuu. O le Lipoti lenei ma le Tulafono a le Tamaitai Minisita, ua faalua ona lauiliuina e Komiti Faa-Palemene, ua faalua ona lauiliuina ma le fautuaga a le Komisi Suesue o Faiga Palota. A o lea lava e aumai e foliga mai o lo o finau manumalo lava le Afioga i le Minisita e tusa ai ma le Teuteuga lea ua aumai ina ia pasia. O le mea lea lau Afioga, ia e tausi le mamalu o le Palemene ma ana Komiti, o le mea lea ua ou tulai atu ai. E le o ni draft mea ia e aumai, o fautuaga a le Komiti e tusa ai ma latou suesuega. Ma le isi mea, o le Palemene, o le Palemene o latou e pasia Tulafono ma mea nei.

O le mea lea lau Afioga i le Fofoga Fetalai ua ou soso atu ai i le Tamaitai Minisita, ina ia silasila i ai i le itu lea.

**FOFOGA FETALAI:** O lea ua maua atu lau Afioga i le Taitai o le Itu Agai. O lea ua maua lou finagalo le Taitai o le Itu Agai.

**Afioga Hon PALUSALUE FAAPO II:** Ma le isi mea o le Palemene, o le Palemene o latou e pasia Tulafono ma mea nei. O le mea lea lau Afioga i le Fofoga Fetalai e fesoasoani atu ai i le Tamaitai Minisita ina ia silasila i ai i le itu lea.

**FOFOGA FETALAI:** Palusalua, na ou manatu o le a fai lau folasaga mulimuli pe a maea, na ou manao se i faaii mai le saunoaga a le Tamaitai Minisita ona fai foi lea o sau faamalamalama i itu uma ia. A o le tatalo lena o lea ua e faafofoga mai ua ou tatalo i le Tamaitai Minisita. E tatou te tatao i le moa o le ala i le finagalo tonu lea e finagalo i ai e aumai le lafo ona faataatia lea i luga o le Laulau a Fono i le tulaga masani. A o le agaga o le tatou toe agai i ai, ou te taliu leaga o lea foi la ua amata ona lagalaga finagalo i le tulaga lea.

Lau Afioga i le Taitai o le Itu Agai, ou te faamalulu atu ai, ae tuu atu pea le avanoa i le Tamaitai Minisita o lea ua ou tatalo i ai e faapuupuu mai le aumaiga o le mataupu ia malamalama le Maota ona aumai ai lea e faatu le tulaga e tatau ona i ai ona tatou faaauau lea. Tulai mai lau Afioga i le Minisita.

**Afioga Hon FIAME NAOMI MATAAFA:** Faafetai lava i lau Afioga i le Fofoga Fetalai, ua matu foi fau i le taliga o le sua i le Maota. Faafetai i le Failautusi ma le Ofisa mo le tapenaga matagofie aua le soifua maloloina o sui usufono.

Lau Afioga tatou te malolo ua oo atu lau faamatalaga i le faauigaina o le upu tu taulaga po o le urban. Ma o lea e eseese le faauigaina ma le faamauiina o uiga o upu ia e lua. Ua tauaveina la e le Komiti le mau o lo o tuuina mai e le Matagaluega o le Siosiomaga, le MNRE aemaise le itutino lea o le PUMA mo le atiinae, ma ua latou faaaogaina ai le faiga faavae o lo o tuuina mai i fuafuaga ia a le Matagaluega. Ae peitai, o le faaaogaina o upu ia e le Matagaluega o Faiga Palota, o lea o lo o faaaogaina le urban po o le definition o le tu taulaga, lea o lo o faaaogaina e le tatou Ofisa o Faamaumauga, le Statistics. Ma ou te fia faatepa lau Afioga ma le Maota i le

Lipoti a le Komiti i le Pepa Faaopoopo Lona Lua, o lo o aumai ai faamaumauga o le Tusigaigoa talu ai nei i le 2011 a le tatou Ofisa o Faamaumauga. Ma o i ina o lo o tau mai ai - urban, Vaimauga West, Faleata East, ona faasolo loa lea o le rural, north west Upolu, west of Upolu, Savaii.

E pei ona faamalamalama atu lau Afioga i le Fofoga Fetalai, e leai se agaga o le Ofisa o le Komesina o Faiga Palota e paoina fuafuaga alualu i luma a le Malo e ala atu i le PUMA, aua o le natura lava lena o le atinae. Ma a silasila foi i ai i fuafuaga a le PUMA, o lea e i ai se fua e faapea, e oo atu i le tausaga 2021, ua oo atu le faasologa lea o le tau o le urban agai i Fasitoo, ona mafaufau lea pe o le mea lea o lea lava ua tatou agai atu i ai.

Lau Afioga i le Fofoga Fetalai, o le fuafuaga e pei ona faataatia atu....

**Tofa Lealailepule Rimoni Aiafi:** Lau Afioga i le Fofoga Fetalai, e a pe a avatu se faasaoga i le vaega lea ua agai mai i ai le Tamaitai Minisita?

**FOFOGA FETALAI:** Malie le sui usufono o le ala foi lea na ou tatalo ai i le Taitai o le Itu Agai. Ou te avatua lava le avanoa pe a maea mai, o lea foi ua e faafofoga mai ua ou... ina ne i mea ane ua toso ai le laau felefele i le tatou taimi lea sa ou tatalo atu ai, ae avatu pea le avanoa pe a maea le saunoaga.

**Tofa Lealailepule Rimoni Aiafi:** Ia, thank you. Faafetai lava.

**Afioga Hon FIAME NAOMI MATAAFA:** Lau Afioga, o le fua la lea o tuaoi ua faataatia atu, o se fua lea o lo o talafeagai ma lea foi vaai i le mea e tau o le tu taulaga po o le urban. Ma e faaopoopo ma fesoasoani i le galuega a le Ofisa o le Komesina o Faiga Palota, o faamaumauga a le Ofisa o Faamaumauga, e faamatalaina ai mea ia o lo o moomia e le Tulafono lenei, o fea le mea o lo o alaala ai tagata, ae po o fea foi le mea o lo o i ai o latou fanua saoloto lea e tuliloa mo le agavaa o le Tulafono Tau Faaofi lea.

Lau Afioga i le Fofoga Fetalai ma le mamalu o le Palemene, o se amataga o se mea fou, e leai se agaga e faapea ua faatauagavale i isi itu ia o itumalo e pei ona aumai e tuu atu i tua i Faleata Sisifo ma le Vaimauga Sasae, a o le agaga o le Tulafono, ina ia tau maua mai se ata, putiputi mai faamaumauga, ina ia tatou malamalama ai ma mataitu po o fea tonu lava lea e agai i ai le mea lea e tau o le urban ma mea o lo o feoai ai o tatou tagatanuu, aemaise foi o le faatinoina o latou palota, aua o le isi lea tofi taua o le tagata soifua, o le faatino o lana aiatatau e fai ai lana palota mo Faigamalo mai lea vaitau i lea vaitau.

O le faaaogaina foi o le lola o tagata palota taitoatasi, o se ata lea e tau tapue mai ai, pei se indicator mo i tatou, i le mea lea e i ai tagata o lo o nofoia fanua umia saoloto. A tatou tatala atu i tua e pei ona faatulaga mai i le finagalo o le Komiti, o le mea moni lava, tatou te le o mautinoa lelei, muamua, po ua lava a tatou faamaumauga o lo o i ai e fesoasoani e fau ai lola fou nei ona e le i oo i ai faamaumauga a le tatou Ofisa o Faamaumauga i a tatou tusigaigoa talu ai nei.

Ia, lau Afioga i le Fofoga Fetalai, ou te manatu ua faaiuiu atu sa matou faamatalaga, ma o le isi lava tulaga ou te toe faapupula mo i tatou, aua o se faiga fou lea o le a tatou oo atu i ai, pe o le tuaoi pei ona faatulai atu e le Malo po o le tuaoi pei ona finagalo i ai le tatou Komiti, i tua o le palota e faavae i luga o tagata o lo o nonofo i luga o elelee umia saoloto, o le feau e

sau ai i tua o le mea lea, o tagata ia ua le toe i lalo o le faamalumaluga e masani ai i le aganuu i le pulega a alii ma faipule. O lona uiga, ua amata ona tatou tuliloa le aia a le tagata taitoatasi, aemaise i lona nofo i luga o lona eleele umia saoloto, o mea ia tatou te vaavaai i ai. Ma atonu o le isi foi itu lea e taua ai le tatou amatamata laititi ma tatou mataitu aua o le mea moni lava, e ui o lea tatou te talanoa i nofoa nei o itumalo tu taulaga, a o lea foi o lo o faapea mai le vaaiga a itumalo mavae po o itumalo faaalaalafaga, lea o lo o fai mai, aumai nisi o matou nofoa faaopoopo. Faleata Sisifo faasolosolo atu i Faleula, ma faapena lava ona faasolosolo atu. Ae peitai, e i ai lava le agaga faaeteete aua e maaleale le tafa lea, o le pulega a alii ma faipule, o aiaiga faaleaganuu, ma uiga o lo o tuliloa i le mea lenei o le tagata ua nofo i luga o le fanua umia saoloto. Ma ou te manatu e ao ona tatou auiliili i ai, po o le a le tatou faaiuga e fai i ai i le Tulafono lenei, a pule alofa le Atua tatou te aulia le tausaga fou tulai mai se Malo, ona faapena lea ona tatou auiliili ma vaavaai, po o lelei pea le faavae lea e faavae ai tatou Faiga Palota, po o a tatou tu ma aganuu, po o le mea o le a tatou lilifa atu i le faitauaofai o tagata ma le umia saoloto ma le saolotoga o le tagata o lo o nonofo i luga o eleele umia saoloto. O mea ia e lua tatou te vaavaai i ai, le upega lea na faavae mai ai a tatou Faiga Palota, ae ao lava ia i tatou o lo o faia le filifiliga mai lea taimi i lea taimi ona tatou faia le faaiuga talafeagai.

Lau Afioga i le Fofoga Fetalai, ia, atonu e le toe i ai nisi upu se tele e faaopoopo ua manino le avatuina o le mataupu i le Tulafono Tau Faaofi, o lea foi ua taatia le Lipoti a le tatou Komiti. Ae pei la e fia faaiu atu sau faamatalaga, aua o ita lava lenei e tau faitau lava le Lipoti a le Komiti, e fesili atu e ala atu i le Nofoa i lau Afioga i le Taitaifono a le Komiti, lau Afioga i le sui usufono mo Aana Alofi Nu 1 lau Afioga Leaupepe, o lo o faapea mai le itulau lona 2 a le tou lipoti i lalo o le mataupu e 2 o iloiloga a le Komiti, o le parakalafa lona 2. Ma ou te faitauina e faapea. O le naunautaiga, ina ia aua nei tilofia se taunuuga o iloiloga a le Komiti i nei aafiaga ma atagia ai nisi tulaga, e fesiligia ai le faamaoni o galuega ma le le faaituau o faaiuga a le Komiti. Na faia ai iugafono a le Komiti e faapea " E mafai ona auai sui o le Komiti o lo o aafia i le iloiloina o le Tulafono Tau Faaofi ma faaalua manatu i vaega uma o le Tulafono Tau Faaofi o lo o iloiloina, peitai o le a le mafai ona auai nei sui i le taimi e fai ai le faaiuga a le Komiti i le fuaiupu e 5 o le Tulafono Tau Faaofi. I lau vaai atu lau Afioga i le Taitaifono, a faapea ua vaea i latou o e i ai a latou aia feteenai ona ou faapea lea, ua vaea le toatolu o la outou komiti. O le Afioga ia Maualaivao, o le tofa ia Aveau ma le Afioga ia Tialavea. O le Afioga ia Faimalotoa sa toesea o ia ma sa le auai i Fonotaga a la outou Komiti, o lona uiga a ou fua atu i le faaupuga lea e i ai i totonu o la outou lipoti, e toatolu outou na faia le faaiuga o le lipoti lenei. O lau Afioga i le Taitaifono o le Afioga ia Aeau, ma le Afioga ia Afualo. Ona fesili ane lava lea o lou mafaufau faavalea lau Afioga i le Fofoga Fetalai, o le atoaga lea e moomia ai le numera o se faaiuga e fai, ae po o se mea talafeagai foi. Le fai o se faaiuga e ni tagata se toatolu. Lau Afioga i le Fofoga Fetalai, e lelei lava le tatou malamalama aua o lea na tuu atu le faamoemoe ma le talitonuga faatuatuaga o le Maota o le a faapea ona iloilo ma faia faaiuga e le tou komiti. I lou lava manatu, atonu e afaina e a ia aia feteenai o alii faipule, aua o uiga masani o aia feteenai e faailoa, ae le mafai ona taofia ai le fai pea o le faaiuga a le tagata ia i le mea o lo o i ai lona finagalo. Lau Afioga i le Fofoga Fetalai, ua iu le faamatalaga po o fea o le a ave i ai le tofa ma le faautaga a le Maota

lenei, ma ua fai foi le tonu a le Vaega Faaupufai lenei ma ua saunoa i ai le matou Taitai. Ua tatala le palota a le mataupu lenei. E palota le sui o le HRPP i le mea o lo o i ai lona finagalo. Ma atonu a tatou toe mafaufau i tua, sa i ai foi faitioga i le faaogaina o le malosi, o le Vaega faaupufai o lo o tu ai le Malo, ona o lona fuainumera. Ma ia te au lava ia o le sui o le Vaega Faaupufai lenei, e ui o au o le Minisita e ou le Tulafono ua ou talia, po o fea lava le mea e i ai le tofa ma le faautaga a le Maota lenei, tatou faapea ona fai lau Afioga i le Fofoga Fetalai. Ae na o le pau lava le mea ou te tatalo atu ai, i le toe teuteuga lava lea, faamolemole, o le fautuaga ua oo mai ia te au i le tatou Ofisa o le Loia Sili, e le o talafeagai le faaupuga o tuaoi o lo o taatia ai e tusa ma le faatulagaina o le tatou Tulafono o itumalo faaalalafaga. Afai lau Afioga e fai se tatou filifiliga e ala i le palota malo le mau a le Malo i lana Tulafono, faafetai faaauau loa le tatou Tulafono galulue le matou Matagaluega, ae afai o le a faaauau le tatou palota ae malo le mau a le Komiti. O lau talosaga lau Afioga i le Fofoga Fetalai, aumai le finagalo o le Maota e toe tapena lelei mai ai le faaupuga talafeagai o le tuaoi, i faaupuga o le Tulafono, e pei ona taatia ai le tatou Tulafono, o itumalo faaalalafaga. Ona faauma atu ai lea o sa matou tala, faamalulu atu pe a faapea ua i ai se pati ua sala, e leai lava se agaga e faaleaga i se finagalo ua faaalialia i lenei Tulafono, aua e malie ai foi ia saunoaga a nisi o sui usufono, e tofua lava le sui usufono ia ma lona lava finagalo. Ao le faamoemoe a le Malo i nofo a Matagaluega e pei ona matou galulue ma tautua ai, e tau sue lava se alavaa tatou te taunuu ai i se taunuuga lelei. Ma le faaaloalo lau Afioga i le Fofoga Fetalai.

**FOFOGA FETALAI:** Malo. Faafetai saunoa i lau Afioga i le Minisita. O lea lava sa olo le fua ma tapuai ma faafogafoga i tuleiga ma saunoaga, e ala i lau saunoaga manino o lea ua toe agiga i le Maota i lenei taeao. Sa matou mau iumaea foi ma matou vaavaai ma matau atu, o lea sa e faalele ae o matou matau, tuleiga i lou finagalo, toe faataatia i luma o le Laulau a Fono, ona o le tulai mai o le lipoti a le Komiti filifilia sa faaiugafonoina e le tatou Palemene, latou te toe lauliliuina le mataupu lenei. Ou te faamalulu atu i lau Afioga i le Minisita, o le ala foi lea o lou tatalo atu e faapuupuu mai le saunoaga, leaga ou te manatu ua manino lau folasaga i lenei aso. Tulai mai lau Afioga i le Palemia...

**Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai e le toe tele se upu o lona ua saunoa manino le Minisita o lo o tauaveina le Tulafono a lo tatou Malo. Ma a toe tomanatu i felafolafoaiga a le Palemene i le Tulafono lava lenei aemaise le fuaiupu tonu lava o lea e avea ma to'a o le tatou Tulafono, sa tataua ona pasia le Tulafono lenei i le tatou tauaofiaga talu ai. Aepeitai ane i le faaoololomaau mai a lo tatou Maota nei ma faapena foi se faaiuga ua taunuu i ai lenei Vaega Faaupufai. A toe tomanatu, e umi lava se taimi o ou talanoa i le faaogaina tataua o le pule, o le power, ona o le Vaega lenei o le Vaega toatele, o lo o mulimulitai i tu ma aga faatemokarasi o lo o fausia ai lo tatou Malo ma Malo uma saoloto faatemokarasi o le lalolagi, under the rule of law. E usitaia ia Tulafono. Ma na ou taua ai, o le Vaega lenei o le Vaega e faataua tele le mau ina ia aua nei faaogaina lona malosi ina ia taomia ai se aiatatau a se vaega toaititi. O le igoa o le Vaega lenei o le Vaega e Puipuia Aia Tataua a Tagata. O le a le uiga

o ia upu? E le na o aiatatau a le atunuu lautele po o lenei Itu, ae faapena foi ma aiatatau a lena Itu e puipuia, ae soalaupule lava mataupu uma.

O le ala lea na ae ai se manatu o le Vaega nei ina ia toe tuu atu se avanoa e toe ave ai i o i le Komiti e avanoa ai i latou o lo o ese foi le latou faitau. A o le Tulafono lenei na aumai lava e pasi i le tatou Fonotaga talu ai. O lea la ua foi mai le Lipoti a le Komiti, faamalo atu foi i le Taitaifono ma le Komiti, e le faigofie le galuega sa faafeagai ma outou, a o uiga ia faa-Palemene, a uma la outou galuega e toe foi mai lava i le Maota lenei. E le o se faatonuga, a o le tuualalo, o le fautuaga, e aumai e fai i ai faaiuga a le Palemene lenei lau Afioga i le Fofoga Fetalai. A maea loa lea ona avea loa lea ma Tulafono. E matua manino lelei le folasaga a le Minisita, o Tulafono o Tulafono a le Malo, e le mafai ona aveesea le aiatatau o le faitau eseese o taofi. E le gata i ina ae faapena foi i inei i lenei foi Vaega. O le tulaga la e pei ona fofogaina ai le Maota, o le tatala o le palota a le Vaega lenei. E lua lava ituaiga palota so o se Palemene lava faatemokalasi, e ui o Faigamalo faatemokalasi e le o ni Faigamalo foi e atoatoa, e tele lava faafitauli, e le faapea e selau pasene ia Faigamalo faatemokarasi, e tele lava faafitauli ma mea faaletonu la e i ai. O le faatemokarasi lea na filifilia ai ia Hitila e avea ma Taitai o Siamani. Na ona pai atu lava i luga faaoga loa le temokalasi lena e pule faasoloatoa ai faa-Militeli, ia mafai ai ona pule soonafai, na iu ai ina tau le lalolagi lenei. Lau Afioga i le Fofoga Fetalai, na faitau miliona ma miliona tagata na maliliu ai. A o faiga faatemokarasi na oo ai i luga ia Hitila. O lona uiga e le faapea foi e i ai se atoatoa o i ai i faiga faatemokarasi. E pau lona, na o le pau lava lea o ituaiga Faigamalo e sili atu ona laitiiti faafitauli nai lo nisi lava Faigamalo o lo o i ai nei i le lalolagi.

O le mea lea lau Afioga i le Fofoga Fetalai, o lea ua taoto le paega atoa o tulaga na tulai atu ai le Minisita ma avatu i lumamea, ma ua tatala ai foi ma le palota, e le faapea ua tulai mai o se Vaega, po o le a le Vaega ua manumalo, e leai. O le taeao lenei, o le taeao o le aiatatau, faaali lou finagalo i lau faiga palota saoloto, o lea ua tatala. Ia e faapena faiga faatemokarasi faa-Westminister, e i ai le taimi e tatala ai, e i ai foi le taimi e alu ai faa-Vaega, pei foi ona fai talu ai. O le taimi la lenei le tatou Vaega, ia lena, e fai lava lau aiatatau, o lou saolotoga ina ia silafia ai e le atunuu, e le i soona faaigoaina le Vaega lenei, o le Vaega e Puipuia Aiatatau a Tagata. E oo foi i lau aiatatau, e tatau foi ona puipuia. Lau Afioga i le Fofoga Fetalai, o le tulaga lena, e le o se manumalo po o le a le finau, o lea ua taoto taiala na faavae ai manatu o le Malo, a o le taimi lenei, o le taimi o le aiatatau.

Lau Afioga i le Fofoga Fetalai, o le toe faaopoopo atu lena.

**FOFOGA FETALAI:** Malo faafetai i lau Afioga i le Palemia.

Tulai mai le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, faafetai mo le avanoa. E logo i tino lava matagi lelei i le saunoaga a lau Afioga i le Palemia, ae le gata foi i lea o lau Afioga i le Minisita e ou le Tulafono. Ou te manatu lava e le o se faaiuga e faigofie, aemaise lava le tulaga o Malo Faatemokarasi fai Vaega. A o lenei taeao, o lea ua fofoga le Maota aemaise foi o le molimau mai a le Atunuu, se ua faamalo le faatoatoa, faafetai o le a le iuga o le Faiga Palota, ua manumalo le Faatemokarasi. E moni lava lau saunoaga lau Afioga i le Palemia, o i ina o lo o i ai le

malosiaga, o le power o lo o i ina, a o le Faatemokarasi, o le mea aupito sili lea ona taua e limataitaiina uma ai Palemene a le lalolagi.

O le mea la lea ua ou tulai atu ai e momoli atu le faamalo ma le faafetai ona o le tofa ua ae, e le tupu soo lea mea, aua a oo lava ina tulai mai le Faigamalo e taitaia le atunuu, e alu lava i le mea e tele i ai le finagalo, aemaise lava o Tulafono e faataoto mai mo le manuia o si o tatou atunuu. O le ala lea o lou tulai atu lau Afioga i le Fofoga Fetalai, ona ua manumalo le Faatemokarasi e tusa ai ma le saunoaga manino a lau Afioga i le Palemia ma le saunoaga foi a le Afioga i le Minisita e ou le Tulafono Tau Faaofi. E ui lava ina saunoa le Afioga i le Minisita i le tulaga foi lea pei e foliga o lo o naunau mai, ae i ai lou talitonuga i le mamalu o lenei Palemene, o lea ua saunoa le Palemia, o le aiatatau, o le mea aupito sili lea ona taua. Maumau e pe ana tatou palota uma i a tatou Tulafono uma aemaise o le Teuteuga o le Faavae i le aiatatau. Ae peitai, ia tatou aea lea manu ua ulu lenei Itu o le Maota, talosia ia saga musuia le Palemia ma le la Itu i teuteuga o lo o faagasolo mai ina ia fai le musumusuga a le Agaga Paia pei o lenei aso. Ia manuia tele le tatou Faiga Palota aemaise le Afioga i le Minisita e ana le Tulafono Tau Faaofi.

**FOFOGA FETALAI:** Oi, Papaliitele, se i avatu le avanoa mulimuli lea.

**Susuga Hon PAPALIITELE NIKO LEE HANG:** Faafetai i lau Afioga mo le avanoa. E leai na o se mea e fia malamalama ai lou nei tagata, ona o lea e foliga mai o le a alo atu i le faiga palota, ae i ai nai fesili ia e fia fesiligia ai le Lipoti faamolemole pe maua i ai se avanoa.

**FOFOGA FETALAI:** O le a le mataupu lea e te saunoa i ai?

**Susuga Hon PAPALIITELE NIKO LEE HANG:** O le mea lava lea o lo o fai i ai le palota lau Afioga, le Fuaiupu 5 lea o le fautuaga a le Komiti.

**FOFOGA FETALAI:** Ia se i saunoa mai le sui usufono, e tuu atu pea le avanoa.

**Susuga Hon PAPALIITELE NIKO LEE HANG:** E muamua lava ona ou faafetai i le Afioga i le Minisita, o lea ua tau malie lava i le faalogologo ua tau manino mai le faasologa o galuega e tataua ona i ai, o lea foi la ua faailoa mai e le Ofisa o le Loia Sili le tulaga e lapelapea ai le fautuaga lea a le Komiti. O lau fesili la faamolemole, o lea la o le a fai le palota, pe talia le fautuaga a le Komiti, pe talia le fautuaga a le Minisita e ala mai i le Kapeneta. A o le isi la fesili faamolemole, o lona uiga la o le a toe toloa foi le mataupu ma tuai ai ona fai le lesitala a le matou palota? O le tulaga lena e oo i ai pe a faapea e fai le palota?

Ma le isi, a le talafeagai la ma Tulafono Tumau lea tulaga, ua tataua foi la ona toe oo i tua ma tuai atu ai lava ma le faiga o le galuega a o lea e fia faatope le tatou galuega.

Ma le lua lau Afioga, o le Lipoti lea o molimau ia e aumai, na o le toaluasefuluvalu tagata, le mamalu o le atunuu na molimau. A fua la i le faamatalaga a le Komiti e faapea e 90% o le mamalu o le atunuu na molimau. A fua la i le faamatalaga a le Komiti e faapea o le 90% o molimau na manaomia le tolo i tua o le palota, ailoga o representative lenei fuainumera e

fai e le Komiti se faaiuga faapea e teena ai le finagalo o le Malo lea na aumai i le fautuaga muamua. Ma le lua, na o le tolu lava sui o le Komiti lea na faia le faaiuga pe a tusa ai ma le Lipoti a le Taitaifono, sa le auai sui usufono lea e aafia i le mataupu. O lona uiga la ou te le iloa po o le a le moni ma le faamaoni o nei Lipoti. Ma lou faaaloalo lava.

**FOFOGA FETALAI:** Malo. O lea ua maua lou finagalo lau Afioga Papalii. Se i tulai mai se tasi o sui usufono o le Komiti.

**Afioga AFUALO WOOD UTI SALELE (Salega):** Faafetai i lau Afioga i le Fofoga Fetalai mo le avanoa. Ua ou tulai atu ona o se mea e fia faasao. Muamua, e faafetai lava i lau Afioga i le Palemia mo le tofa tatala. Ae ona o lea na saunoa manino lava le Afioga i le Minisita o lea foi ua toe saunoa mai Papaliitele, pei e foliga mai o lea ua lafo mai le uluulu o le laau ia maua ma Aeau, a o le upu moni lava, se sa sasaa faaoti le utu a le faimea, e le i faigofie, e le i momoe foi ae na tatalo i le Alii e fesoasoani mai. O le faaiuga foi lea na fai, e le i faia na o maua, vagana lava Mauala e le i ai se i tulou. Sa talanoa uma i mea nei, sa matou lotea uma. A ua saili saili, ua oo mai le musumusuga a le Agaga, o le mea e tatau ona i ai. O le iuga foi lea e i i , e le o se iuga a matou, o le iuga sa saili ma le amiotonu ina ia mautinoa e le faia mo i matou nei, e omai tatou toe o, a ia taoto se mea lelei mo le atunuu. O le uiga tonu lena, ae ona o lea ua faaoloataua le saunoaga a le Tamaitai Minisita, ia o le agaga lena, e leai se agaga faapena. E le aumaia foi i inei i le Maota ni iuga...

**Afioga Hon Fiamē Naomi Mataafa:** O le mea e fia faasao lau Afioga, e le o ni upu a au lea e i totonu o le Lipoti, o upu lava a outou.

**Afioga AFUALO WOOD UTI SALELE:** Leai o lea ua e lafo mai le pua ia matou faapea na o au ma le Afioga ia Aeau ma le Taitaifono lea na faia le faaiuga.

**FOFOGA FETALAI:** Ia, ou te manatu ua manino ma malamalama le mataupu.

**Afioga Hon Fiamē Naomi Mataafa:** E le o ni upu a au, o upu lava o le tou Lipoti.

**FOFOGA FETALAI:** Malie lau Afioga i le Minisita o lea o le a ou faauma atua le tatou mataupu ua alu foi le tatou taimi. E i ai se isi mea lau Afioga i le Palemia?

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, se o le mea lena ua ou tulai atu ai, pei ua tau mao ea lau tu lea na ou tu atu ai, o lau faitau ua uma mea uma, toe lava o le palota le mea lea e faatali.

**FOFOGA FETALAI:** Ia, o le ala lena le paia ma le mamalu o le Maota o lea sa tau faavaevae atu se upu a le Fofoga Fetalai. Ae ona o le tulai mai o le Afioga i le Palemia, ua manino ma malamalama ai le isi faalau atoa o lo o tau



faapulapula atu. Na pau lava lea o le mea ou te fia afea, leaga e pala maa ae le pala tala, o lea foi e mau faamaumauga a le Maota Fono mo le lumanai, ina ne i mau eseese Tutuila ma Ape ona le mautonu lea o le mataupu. O le tatou process, o le matafaioi tonu lava lena a le Palemene e fai. O le fetuunaiga o tatou galuega, e aumai Tulafono a le Malo ona aumai lea iinei i le Maota, ma o le Maota lenei e faia tonu, e leai lava se isi pule i tua atu o le Maota Fono lenei. Po o fea la le mea e agai i ai le tulaga o le faatulagaga o Tulafono, the last word, o le Maota Fono lenei. E pasi loa le Tulafono, ona avea loa lea ma Tulafono, e leai se isi i luga atu. A tatou taunuu mai loa i le Maota lenei, o tatou uma o sui usufono, we are all Parliamentarians, ua tatou omai e fai, lipoi upu o le atunuu ma fai tatou faiga faavae. O le a foi le naunau mai o Tulafono e tuuina mai, a lea e taatia le aulape o le tatou Fono na uma nei? O lea ua saunoa malamalama le Afioga i le Palemia, e le i faigofie le tatou Fono na uma nei. Na a? Na tali ai, ave i tua le mataupu, se i toe lauiliu le tofa, na ave, ave ave i fea? Fai le tatou faaiuga, ua aveese au. Silasila i ai, aveese au o le Fofoga Fetalai o la e i lalo o le Tulafono Tumau, o le Komiti lea ou te Taitaifono ai ma le Afioga i le Palemia ma le Taitai o le Itu Agai. O le a sau upu na fai i le taimi na tafea ai le lafo na ou aumaia i le Maota lenei, na fofoga e le Afioga i le Sui Fofoga Fetalai? O lea lava e nofonono ma omiomi ona o le vaai i le nofo filemu o le Maota. O le ala lea o lou toe faamanatu atu, o le process, e tasi lava le tagata e faia le faaiuga o le mea lea o le Fofoga Fetalai, le faasologa o le tatou galuega. Ma e tataua ona ou faamanino le mea lena, e le faia e se loia po o se isi tagata. O lea ua ou tautino atu le mea lea, ma o le faaiuga na fai e le Maota, lea na ou avatua, o le Taitaifono, Toleafoa ma lana Komiti o latou latou te agai e filifili, o le Komiti na filifilia. O lea la ua aumai lo latou finagalo lea ua taatia i le Maota Fono, fai lea o la outou tofa ma la outou faautautaga oo, e saili ai po o fea o taoto ai le amiotonu. Ae ou te manumanu ne i faamamasagia a outou Afioga, tou te i ai uma i Komiti faa-Palemene. E le o ni Komiti Tumama po o ni Komiti... e leai, o Komiti Filifilia a le Palemene.

O lea la ua tatou taunuu mai i le aso, o le ala lea o lou pipii atu lau Afioga i le Minisita, malie lou finagalo, o lea ua tatou matua oo i ooooga o le mataupu lenei, ua tali le Afioga i le Palemia, fai ni ai i le malomaloa o le tatou Fono, toe tatala le avanoa i le atunuu. O lea ua aumai le Tulafono, o le malosiaga atoa na avatu i le Taitaifono ma lana Komiti, e filifili latou. E tasi lava le auga na ala ai ona mafua ona atagia tulaga ia i a latou suesuega ma auiliiliga, pule latou. O le faaiuga, lea ua tuuina mai i le latou tapenaga lea ua i luga o Pepa o Galuega. O le ala lea e tataua ona ou faamalamalama tulaga ia ina ia manino ma malamalama ne i te i ua tatou o pogisa ona le manino lea o le tatou Fonotaga mo le lumanai.

Ae ou te faamalulu atu i le Maota, o lea ua taatia i lagatonu saunoaga ma tuleiga ua saunoa i ai le Minisita, o lea foi ua saunoa le Komiti, ia vaatele i o outou finagalo ne i meaane ua faapea ua faapito manu ia tasi i sa outou faaiuga ua fai. O lea ua uma ona agiga la outou faaiuga, o lea ua taatia o le a fai i ai le tatou tala.

Lau Afioga i le Taitaifono, tulai mai.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai, ou te tulai atu ma le agaga faaaloalo ua malie le faalogologo i le saunoaga a lau Afioga i le Fofoga Fetalai po o le Taitaifono o

le Palemene. Ou te faamalulu atu foi i lau Afioga i le Tamaitai Minisita, e leai e le faatauta se lagona ma le finagalo o lau Afioga ma le Matagaluega, e taua foi lou finagalo ma mau pei ona tuuina mai, ae o le matou tiute foi lea e ao ona matou tuuina mai i luma o le Palemene le mea o lo o mafuli i ai tali ma le finagalo o molimau ma le atunuu na o atu matou feiloai. Ma le agaga faaaloalo, faafetai i lau Afioga.

**FOFOGA FETALAI:** O lea ua faataatia le tatou mataupu i lagatonu i le tuituliloa o le amiotonu, ua ou manatu ai o lenei mataupu e tatau ona fai se tatou palota tauvalaau, ia aua ne i atagia se faaiuga e fai e au po o le ioe po o le leai, a ia tutulai mai pea le sui usufono ma lona finagalo ia ogatusa ma le finagalo na saunoa i ai le Palemia.

*Na ta le logo.*

**Afioga Maualaivao Pat Ah Him:** Lau Afioga i le Fofoga Fetalai faamolemole....

**FOFOGA FETALAI:** Maualaivao, e i ai ni ou alofa i le tatou mataupu? O le a le mea lea e te fia saunoa mai ai?

**Afioga Maualaivao Pat Ah Him:** Ioe lau Afioga i le Taitaifono, na o sina mea laititi lava lea e le toe siia foi se upu po o se ta e tusa ai ma le tulaga. E faamalulu atu lava i lau Afioga ma le mamalu o le Fono, ona o lea o le a alo i le faiga palota, ae i ai lava si tamai mea laititi lea lau Afioga e fia faamanino, ina ia... o le fesili sa sau analeila, po o le a le mea na ou le saina ai i le Lipoti. O le agaga moni lena.

**FOFOGA FETALAI:** Malie Maualaivao ua e faafofoga mai o lea e tau faamatalatala atu, e le o ni ai avea na ou avatua le malosiaga i le Afioga i le Taitaifono, filifili outou, a faalogo atu le tagata e le tatau ona aafia i le faiga o le faaiuga, tulai. O le conflict of interest le issue na mafua ai ona fai a outou faaiuga. E ui i lea, o lea ua ta le tatou logo.

**Afioga Hon Palusalue Faapo II:** Lau Afioga i le Fofoga Fetalai, na o si mea lava lea e faafesili atu ai. Po o fea tonu lava le mea lea o le a fai ai le tatou palota, po o le Lipoti a le Komiti, po o le Teuteuga a le Afioga i le Tamaitai Minisita? Ne i te i ua sese atu ai se isi.

**FOFOGA FETALAI:** Mo le silafia Palusalue e tasi lava le fesili, pe faamaonia le Teuteuga a le Komiti.

**FESILI:** O e finagalo e lagolagoina le Teuteuga a le Komiti i le Fuaiupu 5 tutulai mai.

#### **PALOTA TAUVALAAU T.T.93(1)**

1. Afioga Hon Tuisugaletaua Sofara Aveau.
2. Tofa Hon Tolofuaivalelei Falemoe Leiataua.

3. Afioga Hon Le Mamea Lemalu Su'a Leatuavao Tuiletufuga Ropati Mualia.
4. Tofa Hon Faamoetaulua Lealaiauloto Ulaitino Faale Tumaalii.
5. Afioga Hon Magele Mauiliu.
6. Afioga Hon Leaupepe Toleafoa Apulu Faafisi.
7. Tofa Hon Tuuu Anasii Leota.
8. Tofa Tapuai Toese Ah Sam.
9. Tofa Tuileutu Alavaa Voi.
10. Susuga Papalii Lio Faavaivaomanu Taeu Masipau.
11. Afioga Afualo Wood Uti Salele.
12. Tofa Motuopuaa Uifagasa Aisoli Vaai.
13. Afioga Hon Aeau Peniamina Leavaiseeta.
14. Afioga Hon Palusalua Faapo II.
15. Tofa Aveau Tuala Lepale Niko Palamo.
16. Tofa Levaopolo Talatonu.
17. Tofa Lealailepule Rimoni Aiafi.
18. Afioga Toeolesulusulu Cedric Pose Salesa Schuster.
19. Afioga Hon Faumuina Tiatia Faaolatane Liuga.
20. Afioga Lafaitale Patrick Leiatuaalesa.
21. Tofa Faimalotoa Kika Iemaima Stowers.
22. Tofa Tuisa Tasi Patea.
23. Tofa Lenatai Victor Faafoi Tamapua.
24. Tofa Sooalo Mene.
25. Susuga Ifopo Matia Filisi.
26. Afioga Tialavea Fea Tionisio Seigafolava.
27. Tofa Tusa Misi Tupuola.
28. Afioga Tafua Maluelue Tafua.
29. Afioga Hon Gatoloaifaana Amataga Alesana Gidlow.
30. Tofa Agafili Patisela Eteuati Tolovaa.

### IOE – 30

**FOFOGA FETALAI:** O e tetee i le lafo, tutulai mai.

1. Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi.
2. Tofa Hon Fonotoe Nuafesili Pierre Laufo.
3. Afioga Hon Fiamme Naomi Mataafa.
4. Tofa Hon Tuiloma Lameko.
5. Afioga Lautafi Fio Selafi Purcell.
6. Afioga Hon Manualesagalala Mati Tuigamala Enokati Posala.
7. Afioga Hon Sala Fata Lisati Pinati.
8. Tofa Fagaavalu Kenrick Samu.
9. Afioga Tufuga Gafualeata Faitua.
10. Tofa Alo Fulifuli Taveuveu.
11. Afioga Afoafouvale John Moors.
12. Afioga Taefu Lemi.
13. Afioga Maualaivao Pat Ah Him.
14. Afioga Peseta Vaifou Tevaga.
15. Susuga Seiuli Ueligitone Seiuli.

16. Susuga Hon Papaliitele Niko Lee Hang.

### LEAI – 16

**FOFOGA FETALAI:** O le iuga lenei o le tatou Palota Tauvalaau, o e na lagolagoina le Teuteuga a le Komiti e 30, o e na teena le Teuteuga a le Komiti e 16. O lea ou te faasilasila ai aloaia, ua talia aloaia le Teuteuga a le Komiti.

*Faamaonia le Teuteuga.*

*Faamaonia le Fuaiupu 5 e pei ona Teuteuina.*

**Afioga Hon FIAME NAOMI MATAAFA:** Lau Afioga pe maua se avanoa...

**FOFOGA FETALAI:** Tulai mai lau Afioga i le Minisita.

**Afioga Hon FIAME NAOMI MATAAFA:** Ou te faafetai atu, atonu o lea ua manino le faaiuga o le tatou mataupu, ma o lea foi e i ai isi vaega o le lipoti e fia faamaea. Ae i lau Afioga ou te tatalo atu pea, o lea lava ua ou maua lau saunoaga mai o le faaiuga lava ua aumai i le Komiti o le mea lea. Ae ou te fautua atu pea i le faaupuga o le teuteuga, e le o talafeagai i le Tulafono o itumalo faaalalafaga. Ona o le faapea mai o le tosi o se laina, o le tosi lava o le laina i luga o le pepa, ae ao ona i ai i totonu o le faamalamalamaga o tuaoi ia pine e fesootai ai laina ia, e fua i ai ia le gaioga o le galuega. Na o le pau lava lea lau Afioga, ou te augofie lava lau Afioga e toe tapena lelei mai, le mea lea ua finagalo i ai le Maota. Ae ou te faamolemole atu i le tulaga lena, e faigata tele ona tatou avatu le ituaiga teuteuga lea e fai ai le tatou Tulafono, aua e le o le Tulafono o le faigapalota, o le Tulafono o itumalo faaalalafaga. Na o le toe pai atu ma le faaaloalo.

**FOFOGA FETALAI:** Tulai mai lau Afioga i le sui Taitai o le Itu Agai....

**Afioga Hon AEAU PENIAMINA LEAVAISEETA (Falealupo):** Lau Afioga i le Fofoga Fetalai, e talitonu e faigata foi i le matou Taitaifono ma le matou komiti ona tulai mai, leaga ai e ava i le Minisita. Lau Afioga i le Fofoga Fetalai, ou te tulai atu e momoli atu le faafetai. Faafetai i le maotaga lenei, aisea? leaga ou te talitonu e i ai le mea na base ai la outou palota i le palota lea talu ai nei. Palota i suesuega a le Komiti ma le mamalu o le atunuu na autovaa atu i tai. E lei soona faia. O mea uma foi nei na matou ui mai ai le Komiti lenei, talofa e o le Komiti a le Palemene lau Afioga e le amanaia. Sa uma suesuega, o le eseesega lea o lou talitonuga na o oe ma le suesuega na aofia ai le atunuu. Ae faafetai i le tofa. Faafetai.

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga e leai lava se faafitauli o le lalolagi lenei e leai se fofo, e i ai lava le fofo o mea uma. E i ai le igoa matai o le itulagi lea e faaigoa ia Taatiamai. Taatia maia, e tele taeao o le atunuu e...

**FOFOGA FETALAI:** E manatu o le tali foi lea o lea ua saunoa le Minisita, taatia maia i le Matagaluega. O le a tagai i ai le Matagaluega e uiga i le atugaluga i le faaigoaina o le Tulafono, o le a nafa ma afioga i alii loia mo le faatulagaga ina ia faatulaga tonu i le mea e talafeagai ona i ai. O fea e ave i ai aiaiga o le Tulafono ina ia taatia i le agatonu, fai lena. Momoli atu le faafetai tele o lea ua maea ia atuvasa sa tatou lauliliuina i se taimi ua fai si umiumi ona e le faigofie, ae faamalo atu le tofa i le paia ma le mamalu o le tatou Maota. Faamalo atu foi i lau Afioga i le Minisita, tatou te i luga lava o le fefinuaiga ma le faaaliga o taofi, ae tasi lava le faafitiga o aleaga ina ia manuia ma taatia i le agatonu la tatou Tulafono o Komiti o faigapalota.

**FUAIUPU 6:** Tulafono faatonutonu tau soloaiga.

*Faamaonia.*

#### **FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Faiga Palota (Nu. 2) 2015.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Faiga Palota (Nu. 2) 2015 faatasi ma Teuteuga.*

#### **TULAFONO TAU FAAOFI O TEUTEUGA O LE FAAVAE (NU.2) 2014 - iloiloga auiliili.**

**FOFOGA FETALAI:** E tusa ai ma le Tulafono Tumau 106, e tataua ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Taitaifono o le Komiti o Oloa Gaosia Tulaga muamua, Mataupu tau Pisinisi, Alamanuia ma Leipa.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai ou te tulai atu e faatu le lafo, *Ina ia faamaonia e lenei Fono Aoa le Lipoti a le Komiti o lo o fautuaina ai e faapea, Ina ia faagasolo le Tulafono Tau Faaofi o Teuteuga o le Faavae (Nu. 2) 2014 faatasi ma Teuteuga ma Faasaoga.*

*Faaluaina e le sui usufono mo Siumu.*

**FOFOGA FETALAI:** E faasilasila atu ua faamaonia nei e le Fono Aoa le Lipoti a le Komiti o Oloa Gaosia Tulaga muamua, Mataupu tau Pisinisi ma Leipa i le Tulafono Tau Faaofi o le Teuteuga o le Faavae Nu 2 2014.

O le a sagai atu loa le Fono Aoa i le Iloiloga auiliili o le Tulafono Tau Faaofi o le Teuteuga o le Faavae Nu 2 2014. E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

**FUAIUPU 2: Ua teuteuina le Fuaiupu 6.**

*Faamaonia.*

**FUAIUPU 3: Ua teuteuina le mataupu 18.**

*Faamaonia.*

**FUAIUPU 4: Ua teuteuina le mataupu 19.**

*Faamaonia.*

**FUAIUPU 5: Ua teuteuina le mataupu 25.**

*Faamaonia.*

**FUAIUPU 6: Ua teuteuina le mataupu 44.**

*Faamaonia.*

**FUAIUPU 7: Ua teuteuina le mataupu 49**

*Faamaonia.*

**Afioga Hon PALUSALUE FAAPO II:** Lau Afioga.....

**FOFOGA FETALAI:** O le a le fuaiupu?

**Afioga Hon PALUSALUE FAAPO II:** O le fuaiupu 4.

**FOFOGA FETALAI:** Fuaiupu 4 po o le.....

**Afioga Hon PALUSALUE FAAPO II:** E leai o lou tulai atu, i le aumaiga o le Teuteuga o le Faavae. E fia malamalama la, pe aumai auauai ia teuteuga o le Faavae ma palota auauai ai e tusa ai ma....

**FOFOGA FETALAI:** Ou te manatu ne'i tei ua tatou see ese ma tulaga masani o le tatou faamoemoe. E le tasi se teuteuga o lo o tuu mai, o le atoaga atoa o le palota mulimuli. E fai lava faaali lou finagalo i le tulaga o lo o aumai ai mataupu taitasi. O le ala lea o lou fesili atu po o ua i ai aiaiga i le mea lea e te saunoa mai ai. Ae o lo o faasolo pea mea uma e tusa ai foi ma tatou mea muamua.

**FUAIUPU 8: Ua teuteuina le mataupu 50.**

*Faamaonia.*

**FUAIUPU 9: Ua faaofiina le vaega 4A fou.**

*Faamaonia.*

**FUAIUPU 10: Ua teuteuina le mataupu 83.**

*Faamaonia.*

**FUAIUPU 11: Ua soloia le faamatalaga 1 ma le faamatalaga 2.**

*Faamaonia.*

**FUAIUPU 12: Teuteuga lautele.**

**FOFOGA FETALAI:** O lo o i ai le Teuteuga a le Komiti. Tulai mai lau Afioga i le Taitaifono.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai. Ou te tulai atu ma le faaaloalo e faatu le lafo i le Teuteuga i le Fuaiupu 12 e faapea:

**"TEUTEUGA:**

*Ia faaopoopo le parakalafa (e) fou e faapea, (e) soo se faasinomaga i tagata palota taitoatasi, po o sona suiga tau i le gagana, ia suia i le itumalo o nuu i le taulaga po o sona suiga tau i le gagana.*

*Faamaonia le Teuteuga.*

*Faamaonia le Fuaiupu 12 e pei ona Teuteuina.*

**FUAIUPU 13: Teuteuga faatupulaia.**

*Faamaonia.*

**FUAIUPU 1 MA LE IGOA**

**FUAIUPU 1: Igoa puupuu ma le amataga.**

**IGOA: Teuteuga o le Faavae (Nu. 2) 2014.**

**FOFOGA FETALAI:** O lo o i ai le faasaoga a le Komiti. Tulai mai le Taitaifono.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa o le Tulafono e faapea:

**“FAASAOGA:**

*Ia aveese le (Nu.2) ma le fuainumera 2014 ma suia i le fuainumera 2015, ma faitauina ai le igoa o le Tulafono e faapea:*

**“Teuteuga o le Faavae 2015.””**

*Faamaonia le Faasaoga.*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi o le Teuteuga o le Faavae 2015 faatasi ma Teuteuga ma le Faasaoga.*

**TULAFONO TAU FAAOFI O TEUTEUGA O LE TULAFONO O  
FAIGA PALOTA (NU 2) 2015 - faitauga faatolu**

**Afioga Hon FIAME NAOMI MATAAFA:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o Tulafono o Faiga Palota (Nu 2) 2015 i lona faitauga faatolu.*



*Faaluaina e le Sui Palemia ma le Minisita mo Galuega Tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**TULAFONO TAU FAAOFI O TEUTEUGA O LE FAAVAE 2015  
- faitauga faatolu.**

**Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Teuteuga o le Faavae 2015 i lona faitauga faatolu faatemokalasi.*

*Faaluaina le lafo e le Sui Palemia ma le Minisita mo Galuega Tau Alamanuia ma Atinae a le Malo.*

**Afioga Hon Palusalua Faapo II:** Lau Afioga i le Fofoga Fetalai. Na ona ou fia malamalama lava ma faailoa atu i lau Afioga ma au faaiuga. Ona o teuteuga o le Faavae, e tatau ona fai se palota tauvalaau, o le Teuteuga lea o le Faavae, ae o lea ua faalogo atu, o lea ua faagasolo le pasia o le faitauga lua ma le tolu, ae o lea e tatau ona fai palota tauvalaau o le teuteuga o le Faavae. O le mea lea ua ou tulai atu ai lau Afioga.

**FOFOGA FETALAI:** O lea ua teletelevave mai lau taavale ao lea ou te... we are in the process. Aua le atugalu lau Afioga i le Taitai o le Itu Agai, o lea o le a tatou oo atu i ai. Ua maea ona faamalieina aiaiga o le faavae e tusa ai ma le vaitaimi i le va o faitauga faalua ma le faitauga faatolu o le Tulafono Tau Faaofi o le Teuteuga o le Faavae 2015. O le aiaiga mulimuli e tatau ona faamalieina o le lagolagoina lea o le faitauga faatolu i ni palota e le itiiti ifo i le lua vaetolu i sui usufono o le Palemene, e pei ona atugalu i ai lau Afioga i le Taitai o le Itu Agai.

**Tofa Lealailepule Rimoni Aiafi:** Lau Afioga i le Fofoga Fetalai...

**FOFOGA FETALAI:** Ia...

**Tofa Lealailepule Rimoni Aiafi:** Faafetai lava mo lenei taeao fou ma le aso fou ma le faasologa o le tatou Fonotaga i lenei aso. E pei lava ona malie i saunoaga o lenei aso, o le taeao o le faatemokalasi. O lea la e fautua atu ai i le matou taitai, e manaia pe afai sana saunoaga foi lea. Tatou palota faatemokalasi. Ma le faaaloalo lava.

**Afioga Hon Palusalua Faapo II:** Lau Afioga i le Fofoga Fetalai, o lea ou te tuualalo atu i le Afioga i le Palemia, ina ia palota i le musumusuga a le Agaga Paia, e tusa ai ma upu tomua o tatou Tulafono i lenei taeao. O i e iloa ai le moni o au saunoaga i le Faatemokarasi, le Faatemokarasi lena ia palota le tagata i lona aiatatau, lea e te saunoa soo ai, o le Vaega Faaupufai e Puiipua Aiatatau.

**FOFOGA FETALAI:** O lea ua ou maua atu lau Afioga. O lena e te le i tali i le fesili a lau sui usufono. Ia...

**Tofa LEVAOPOLO TALATONU:** Leai, e ese le mea lea e saunoa i ai le Taitai o le Itu Agai ese lana pepa lea e pasi mai ia matou palota uma i le mea e finagalo i ai, ioe.

**FOFOGA FETALAI:** O le a faatino le Fesili o le faitauga faatolu i se Palota Tauvalaau. E tatalo atu i le tatou Maota o le a ta le tatou logo, o le mea masani ona faagasolo lea o le tatou Palota Tauvalaau e ala i le pasiaina o le tatou Faavae.

*Na ta le logo.*

**Tofa Hon TUUU ANASII LEOTA:** Lau Afioga i le Fofoga Fetalai...

**FOFOGA FETALAI:** Ia, Tuuu...

**Tofa Hon TUUU ANASII LEOTA:** Ona o lea ua alo i le palota, ae silafia e lau Afioga o au le tasi o sui usufono na faaleo lou tetee i le Teuteuga lea o le Faavae, a o lea ua tulai le Taitai o le Itu Agai, e faamalulu atu, o le a ou lagolagoina le mea ua finagalo i ai le Malo. Ma le faaaloalo lava.

**FOFOGA FETALAI:** O le mea lava lea e leaga ai mea e faufau, ioe. Ia, tatou malilie ia tatou onosai i le mea...

**Afioga Hon PALUSALUE FAAPO II:** Lau Afioga i le Fofoga Fetalai, na ona ou fesoasoani atu i lou uso, aua e te palota i lou palaai, ioe, o lae faafogafoga mai lou itumalo ma le atunuu, palota i lau aiatatau ma le mea tonu e tataua ona fai.

**Afioga Hon LE MAMEA ROPATI:** Lau Afioga i le Fofoga Fetalai, e faamalulu atu i le tulai atu ma le ava ma le faaaloalo, o le ma nonofo ai i le taeao ma si ou uso lea, na ou fautua i ai i lona faavalevatea o lea la ua toe foi mai ai e palota i le mea lea ma te i ai, a o lea ua toe talitonu le sui usufono, e sao lelei lava le mea lea e fai atu ai le toaina. Faafetai.

**Tofa Hon TUUU ANASII LEOTA:** Lau Afioga i le Fofoga Fetalai, na ona fia faasao lava pei e tau sasi le upu lea, e le faavalevatea. Na fautua mai ou fai atu, o lea lava ou te tatalo pea i le Alii e fesoasoani mai ia te au. E faamalulu atu Palu, o lea o le a ou palota i lou lagona. Ma lou faaaloalo lava.

**FESILI:** O le Fesili pe o le a faitauina nei le Tulafono Tau Faaofi o Teuteuga o le Faavae 2015 i lona faitauga faatolu, o e finagalo i ai tutulai mai.

## PALOTA TAUVALAAU T.T.93(1)

1. Susuga Hon Tuilaepa Fatialofa Auelua Lupesoliai Aiono Neiotei Sailele Malielegaoi
2. Tofa Hon Fonotoe Nuafesili Pierre Lauofo
3. Afioga Hon Fiame Naomi Mataafa
4. Tofa Hon Tuiloma Lameko
5. Afioga Hon Lautafi Fio Selafi Purcell
6. Afioga Hon Tuisugaletaua Sofara Aveau
7. Tofa Hon Tolofuaivalelei Falemoe Leiataua
8. Afioga Hon Le Mamea Lemalu Su'a Leatuavao Tuiletufuga Ropati Mualia
9. Tofa Hon Faamoetaulua Lealaiauloto Ulaitino Faale Tumaalii
10. Afioga Hon Magele Mauiliu
11. Afioga Hon Manualesagalala Mati Tuigamala Enokati Posala
12. Afioga Hon Sala Fata Lisati Pinati
13. Afioga Hon Leaupepe Toleafoa Apulu Faafisi
14. Tofa Hon Tuuu Anasii Leota
15. Tofa Lealailepule Rimoni Aiafi
16. Afioga Hon Faumuina Tiatia Faaolatane Liuga
17. Tofa Fagaavalu Kenrick Samu
18. Afioga Tufuga Gafualeata Faitua
19. Tofa Alo Fulifuli Taveuveu
20. Afioga Lafaitale Patrick Leiataualesa
21. Tofa Faimalotoa Kika Iemaima Stowers
22. Tofa Tuisa Tasi Patea
23. Tofa Lenatai Victor Faafoi Tamapua
24. Tofa Sooalo Mene
25. Afioga Afoafouvale John Moors
26. Afioga Taefu Lemi
27. Susuga Ifopo Matia Filisi
28. Afioga Tialavea Fea Tionisio Seigafolava
29. Tofa Tusa Misi Tupuola
30. Afioga Maualaivao Pat Ah Him.
31. Afioga Peseta Vaifou Tevaga
32. Susuga Seiuli Ueligitone Seiuli
33. Afioga Tafua Maluelue Tafua
34. Afioga Hon Gatoloaifaana Amataga Alesana Gidlow
35. Susuga Hon Papaliitele Niko Lee Hang
36. Tofa Agafili Patisela Eteuati Tolovaa

## IOE – 36

**FOFOGA FETALAI:** O e tetee i le lafo, tutulai mai.

1. Afioga Hon Palusalua Faapo II
2. Afioga Hon Aeau Peniamina Leavaiseeta
3. Tofa Motuopuaa Uifagasa Aisoli Vaai
4. Afioga Afualo Wood Uti Salele
5. Susuga Papalii Faavaivaioanu Taeu Masipau

6. Tofa Tuileutu Alavaa Voi
7. Tofa Tapuai Toese Ah Sam
8. Tofa Aveau Tuala Lepale Niko Palamo
9. Tofa Levaopolo Talatonu
10. Tofa Toeolesulusulu Cedric Pose Salesa Schuster

### **LEAI – 10**

**FOFOGA FETALAI:** O le iuga lenei o le tatou Palota Tauvalaau i le Tulafono Tau Faaofi o le Teuteuga o le Faavae. O e na lagolagoina le lafo e 36, o e na tetee e 10. Ma ou te faasilasila atu ua pasia aloaia le Tulafono Tau Faaofi o Teuteuga o le Faavae 2015.

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**FOFOGA FETALAI:** Ia, ou te manatu ua tatau ona vavae foe, o le a tatou alo i le faiga malologa o le aoauli, fai se tatou sailiga malosi, ona faapena lea ona faaauau ai le tatou Galuega pea tatou toe taliu mai. O le a faataatia ese Taulumaga a le Fono Aoao mo lana malologa o le aoauli.

*Na faataatia ese Taulumaga a le Fono Aoao i le itula e 12:38 i le aoauli ma toe faaauau i le itula e 1:23 i le aoauli.*

**FOFOGA FETALAI:** E faasilasila atu ua toe amatalia nei Taulumaga a le Fono Aoao Faitulafono.

Ia, e faamalo atu le onosai i lenei vaega o le aso, e manatu o lea ua taliu mai le tatou malologa puupuu. E i ai lava le faamoemoe ina ia maua pea ma fai se tatou malologa faavaitaimi ona o le tulaga ia maua pea lo outou soifua manuia aemaise o le tatou malologa pei ona masani ai.

### **TULAFONO TAU FAAOFI O LE FAATAUTAUINA O TUPE FAAOPOOPO (NU.2) 2014/2015 – faitauga muamua**

**Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.2) 2014/2015 i lona faitauga muamua.*

*Faaluaina e le Sui Palemia ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi o le Faatatauina o Tupe Faaopoopo (Nu.2) 2014/2015 i lona faitauga muamua.*

**TALA FAATATAU O TUPE FAAOPOOPO (NU.2) 2014/2015**  
– faataatia i luga o le Laulau a Fono

*Na faataatia i luga o le Laulau a Fono e Hon Tuilaepa Fatialofa Auelua Lupesoliai Aiono Neioti Sailele Malielegaoi, le Tala Faatatau o Tupe Faaopoopo (Nu.2) 2014/2015.*

**TALA FAATATAU O TUPE FAAOPOOPO (NU.2) 2012/201**  
– lafo mo le faitauga faalua

**Susuga Hon TUILAEPa FATIALOFA AUeLUa LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo Nu.2 2014/2015 i lona faitauga faalua.*

*Faaluaaina e le Sui Palemia, Minisita mo Galuega Tau Alamanuia ma Atinae a le Malo.*

**FOFOGA FETALAI:** E tusa ai ma le Tulafono Tumau 132, o le a tolopo felafolafoaiga o le Tulafono Tau Faaofi i le Tala Faatatau Faaopoopo (Nu.2) 2014/2015 e le itiiti ifo i le 14 aso a o tuuina atu le Tala Faatatau Faaopoopo (Nu.2) 2014/2015 mo le iloiloga auilili i le Komiti o Tupe Maua ma Tupe Totogi ma toe lipoti mai i le Fono Aoa.

**TULAFONO TAU FAAOFI O LE FAATATAUINA O TUPE 2015/2016**  
– faitauga muamua

**Susuga Hon TUILAEPa FATIALOFA AUeLUa LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2015/2016 i lona faitauga muamua.*

*Faaluaaina e le Sui Palemia, Minisita mo Galuega Tau Alamanuia ma Atinae a le Malo ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi o le Faatatauina o Tupe 2015/2016 i lona faitauga muamua.*

**TALA FAATATAU AUTU O TUPE 2015/2016**  
– faataatia i luga o le Laulau a Fono

*Na faataatia i luga o le Laulau a Fono e Hon Tuilaepa Fatialofa Auelua Lupesoliai Aiono Neioti Sailele Malielegaoi, Minisita o Tupe le Tala Faatatau o Tupe 2015/2016.*

**TULAFONO TAU FAAOFI O LE FAATATAUINA O TUPE 2015/2016  
- lafo mo le faitauga faalua**

**Susuga Hon TUILAEP A FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o le Faatatauina o Tupe i lona faitauga faalua.*

*Faaluaina e le Sui Palemia.*

**FOFOGA FETALAI:** Ia, tulai maia lau Afioga i le Palemia mo le Saunoaga i le Tala Faatatau Autu o le Tupe 2015/2016.

**SAUNOAGA I LE TALA FAATATAU O TUPE 2013/2014**

**Afioga Hon TUILAEP A FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ma le mamalu o le Maota, e tusa ai ma le Tulafono Tumau 124, e ia te au le ava ma le faaloalo e avea ai au e fai ma sui o le Malo ou te tuuina atu ai se ootoga o le Tala Faatatau Autu o le Tupe mo le tausaga 2015/2016 i luma o le Laulau a Fono a le Palemene.

**1. FAAVAE O LE TALA AUTU O LE TUPE**

Lau Afioga i le Fofoga Fetalai ma sui usufono mamalu o le Palemene, o leni Tala o le Tupe ua faavae i se faasoaa ua utiuti ma le lava, talu mai lava tulaga ogaoga sa feagai ma le tatou tamaoaga, pei o le faaletonu o le tamaoaga o le lalolagi i le 2008, o galulolo i le 2009 faapea foi le afa o Evani i le 2012, sa maitauina ai le siitai o tupe faaalu a le tatou Malo e tali atu ai i ia faaletonu. Sa maitau foi o nei tupe faaalu sa tele se sao o atunuu mai fafo i le faatupeina. Peitai, o le tausaga 2015/2016, o le a matua tuuititia tupe faaalu, ona o lea ua tele ina maea galuega laveai, ma galuega tauatia sa feagai ma le tatou Malo, aemaise i le tau faaleleia o mea na faaleagaina e le afa o Evani.

Lau Afioga i le Fofoga Fetalai ma sui usufono mamalu o le Palemene, o le upu moni lava e le gafatia e le Malo le faaauau pea o ia tupe faaalu i le maualuga e pei ona i ai i le lima tausaga ua tuanai atu e aunoa ma le fesoasoani a tatou paaga po o le siitia o tatou lava tupe e maua mai tiute ma lafoga. E ao foi ona tatou taumafai ina ia faasoasoa tatau tupe faaalu ina ia ausia le tapulaa o tupe faaalu nai lo tupe maua ia muta mai le 3.5% o le tuufaatasiga o le tamaoaga po o le GDP.

Ina ia ausia lea tulaga, o lea ua manatu ai le Malo ina ia tuuititia tupe faaalu i le tausaga fou. Ma ou te fialia e faailoa atu, ua mafai ona faatino lea faamoemoe e aunoa ma le oia o le auaunaga mo le mamalu o le atunuu. O le feau taua, ia fua le manao i seleni ua mafai ona tatou maua.

**11. TAIALA O LE TALA O LE TUPE**

E i ai le manatu o le a siitia le tamaoaga i le 1.9% i le tausaga leni o le a faagasolo i le tausaga fou, 2015/2016, ma o le a ausia foi le tuuaofaiga o tupe

maua a lo tatou atunuu po o le GDP i le \$2piona tala. O le tau faaiuiu ai o galuega toe faaleleia talu mai le afa o Evani ma le maea ai o le fono tele a Malo tauatia e o le lalolagi lea na usua i Samoa nei i le tausaga ua tuanai, o le a avea lea ma faavae e tuuaititia ai tupe faavae mai le 2015 ma le 2016, fua i le tausaga na tea nei.

O le faasiliga o tupe faalu nai lo tupe maua, o le a faamauina lea i le 4.7% o le tamaoaiga, e maualuga atu nai lo le tapulaa e 4.2% na fuafua mo le tausaga talu ai. Peitai, o se alafua iloga pe a fua i le tulaga pau maualalo o tupe maua.

I le vaega o tupe maua, e leai se faamoemoe o i ai e siitia tiute ma lafoga i le aoaotetele, se i vagana le faamoemoe e faatino na o nai suiga laiti i le lafoga mo faguinu po o fagu suamalie, o ava malosi faapea foi ma sikareti e uunai ai le soifua maloloina, aemaise lava o le soifua maloloina o nai fanau laiti ia aua ne i afaina tele o latou nifo muamua i le fiafia i ia mea suamalie. O lo o fuafua foi e faatino se lafoga e lagolago i le malosiaga faafouina po o le sailia lea o le eletise i mea lava e maua i Samoa nei e pei o le vai, o le la, ia ma le matagi, (renewable energy source). O lea fuafuaga o le a vave ai ona ausia le faaititia le tau o le eletise i le mamalu o le atunuu, e faapea foi ona ausia le manulauti ina ia 100% le eletise e maua mai i le malosi faafouina o mea e maua i totonu lava o Samoa i le tausaga e 2017.

O le a pa'ū maualalo foi tupe faameaalofa mai a tatou paaga i le tausaga fou. E mafua lea tulaga ona o le toe fetuunaiga o tulaga o lo o i ai tatou nonogatupe lea ua see mai i le medium to low debt distress, o lona uiga, mai le maualuga i le tulaga maualalo. O lona uiga la, o le a le toe agavaa ai Samoa i le 100% o tupe faameaalofa, ae see mai i le 50% tupe faameaalofa, 50% tupe nono, pei lava o le tulaga foi lele, afai lava ua malosi lou tamaoaiga, ia e faapena foi ona e le toe moomia tele ni meaalofa mai isi atunuu. O le a fesoasoani foi i le maea ai o galuega toe faaleleia ona o le Afa o Evani, i le pau maualalo o tupe faameaalofa i le tausaga fou. O le tulaga masani lava lea sa o tatou valoia mai le aso na see ese ai le faatulagaga o le tatou tamaoaiga i le lalolagi, mai le tulaga mativa na i ai Samoa i le tulaga maualuga e pei ona faatulaga ai Samoa e le Malo Afaatasi.

E leai la se faamoemoe e toe faatino nisi nonogatupe tetele, se i vagana ua ausia aiaiga o taiala mo nonogatupe pe iloga sona sao i le atinae o le tamaoaiga.

### **III. ATINA'E AUSIA I LE LIMA TAUSAGA UA MAVAE**

Lau Afioga i le Fofoga Fetalai ma sui usufono mamalu o le Palemene.

E ia te au le ava ma le faaaloalo ou te tuuina atu ai se oototoga o faamatalaga i nisi o atinae sa ausia le lima tausaga talu ai o lenei lava foi Nofoaiga Faapalemene. Ua ou taua le Nofoaiga Faapalemene, ona o le tatou galuega e fai faatasi.

Na aafia le tamaoaiga o le atunuu i le lima tausaga ua mavae, e mafua mai lea i faalavelave faalenatura faapea ai ma faaletonu o le tamaoaiga o le lalolagi, (global financial crisis). Sa tali atu le Malo i nei aafiaga e ala lea i le fesiitai o tupe faalu aua le faatinoina o galuega toe faaleleia ma faataoto ai polokalame e uunaia ai atinae mo le tamaoaiga o le atunuu, talu mai le faaletonu o le tamaoaiga o le lalolagi.

E ui la i le tulaga maaleale sa i ai, na iloga ona siitia le tamaoaiga pe a faapasene i le 5.6% i le tausaga faaletupe i le 2010/2011. Na faatupulaia le

tamaoaiga i le 0.4% i le 2011/2012, ae pau maualalo i le 2% i le 2012/2013 ona o aafiaga o Evani ia Tesema 2012 na faaleagaina ai le tele o vaega o le atunuu. Ae peitai, na toe siitia le tamaoaiga i le 2013/2014 i le 1.2%, ona o galuega toe faaleleia o le Afa o Evani, o lo o faamoemoe o le a siitia le tamaoaiga i le 2.3% i le Tausaga Faaletupe 2014/2015 pe a maea faaiu nei i le masina o Iuni, talu ai ona o le taligamalo i le Fonotaga ma Atunuu Laiti Tauatia e o le lalolagi ma le fausiaina o faletalimalo tetele e taiepi o le Lamana Hotel, Aggie Greys Beach Resort, Aggie Greys Hotel, Aga Reef Resort ma le Return to Paradise Resort.

I le itu lava ia tau i aoaoga, e tele fesoasoani i nei vaega ona o se tasi o vaega o lo o ave i ai le faamuamua a lo tatou Malo e tauala atu i taiala mo le atinae o Samoa (SDS). Sa sami aloaia le fuafuaga faataatitia mo vaega maoti o aoaoga o le 2013-2018, o fuafuaga mamao ia e limataitaiina ai galuega faamuamua mo le atinae o aoga, faapea foi ona fesoasoani le Malo i polokalame o le totogiina o Pili Aoga o tamaiti aoga Tulaga Lua faapea foi ma Kolisi.

Ua faapea ona tuuina atu i lalo o le faamalumaluga a le Iunivesete Aoao o Samoa, le Iunivesite Faafomai (Oceania University of Medicine) ma o faamanuiaga uma e ono maua mai ai, o le a pau tonu lava i tamaiti aoga o le atunuu e aunoa ma le toe aiaina mai fafo.

O le maea ai o le Maota Gasegase i Motootua e atagia ai le faamuamua a lo tatou Malo e ala i le atinae o le soifua maloloina. O leni falemai ua faatotogaina i masini faonaponei e faatino ai togafitiga ma auaunaga mo tagata lautele. Ua maea foi ona toe faaleleia falemai faaitumalo i Poutasi, Lalomanu, Safotu, Foailalo ma Sataua. Ina ia maua pea e le mamalu lautele togafitiga i nuu i tua, auaunaga uma tau le Soifua Maloloina.

I le vaega o faatoaga, ua maea foi ona faalauiloa aloaia le Fuafuaga Faataatitia mo le Vaega Maoti o Faatoaga e limataitaiina ai galuega faamuamua. Sa faamuamua le toe lalagaina o le vaega o faatoaga e ala i le polokalame faatosina mo le toe totoina o le koko, niu ma le kofe faapea polokalame o le Talomua. O lo o vaavaalua le galuega lea ma le polokalame o le uunaia o atinae o faatoaga (SACEP) e ala lea i le faaleleia o lafumanu, o faatoaga mo fualaau faisua ma fualaau aina. O lea foi ua amatalia se atinae fou mo le uunaia o Faatoaga Faapisinisi (Agribusiness). O leni taumafaiga e agavaa lava i ai pisinisi tau faatoaga i nonogatupe ma atinae ai maketi i fafo mo le faatauina atu o fua o faaeleeleaga. O lo o faaauau pea foi suesuega a le Faalapotopotoga o Suesuega Faasaienisi a Samoa mo metotia e gaosia ai oloa eseese mai fua o tatou lava faaeleeleaga pei o le avoka ma le ulu e fesoasoani ai i le aufaipisinisi.

I le tulaga o alatetele, ua tele ina siitia ma faaleleia le tulaga o auala i le atunuu atoa, talu ai galuega toe faaleleia ona o le Afa o Evani. Ua maea foi le auala fou mai Samusu i Lalomanu. O le a faapea foi ona toe faaauau le auala mai Vailoa e agai atu i Vaitele. O le auala mai i Apia i Faleolo, o le a toe faaleleia ina ia alofia aafiaga ona o suiga o le tau. Ua maea fausia foi e le Pulega o Femalagaiga i Luga o le Lauelele fuafuaga mo le siitia o tulaga o auala i totonu o le taulaga faapea ma afioaga i tua.

O lo o ave pea le faamamafa i le atinae o le malosiaga faafouina o le eletise ina ia vave ausia le eletise i se tau maualalo ma gafatia e o tatou tagata. Ua mafai nei ona gaosia le eletise mai malosiaga faafouina pei o le malosi o le lā



ma le savili. O lo o mataitu foi le fale eletise i Fiaga ina ia mautinoa le maua pea ai e tagatanuu le auunaga tau eletise i so o se taimi.

O lo o faauuau pea le fesoasoani a le Iuni a Europa i le faatupeina o atinae o le Suavai ina ia siitia pea le auunaga mo le atunuu lautele.

I le itu tau fesootaiga, ua maea nei le atinae mo le Faalateleina o Fesootaiga Faatekonolosi (National Broadband Highway Network). O lenei atinae taua o le a fesoasoani malosi i le siitia o le saosaoa i fesootaiga tau tekonolosi. E mafai foi ona fesoasoani i auunaga faa-Soifua maloloina faapea ma aoaoga ina ia faafaigofie fesootaiga ma nuu ma afioaga i tua.

O le vaega o Turisi o se tasi lea o atinae o lo o ave pea i ai le faamuamua ma le lagolago a lo tatou Malo. O le fesoasoani a le Malo ua mafai ai ona fausia faletalimalo tetele, o le Sheraton Aggie Grey's Beach Resort, Return to Paradise Resort i Lefaga, o le Aga Reef Resort i Lalomanu, faapea le Orator Hotel i Tanumapua. O isi faletalimalo pei o le Lamana Hotel i Taumeasina ma le Aggie Grey's Hotel i Vaisigano o lo o fuafua e maea le fausiaina i le amataga o le tausaga fou.

I le tausaga ua tuana'i, sa talimalo ai Samoa i le fonotaga muamua aupito i tēlē i totonu o le Pasefika mo atunuu laiti tauatia e o le lalolagi. O se avanoa lelei lea e saga faalauiloa ai Samoa i le lalolagi ma faatupulaia ai ia tatou atinae e faasino i tagata tafafao maimoa mai faapea foi fefaatauaiga.

#### **IV. OTOOTOGA O LE TALA O LE TUPE**

Lau Afioga i le Fofoga Fetalai

O le oototoga lenei o le Tala Faatatau Autu o le Tupe mo le Tausaga Faaletupe 2015/2016:

##### **Tupe Maua**

**\$689,013,681**

Tupe Maua Masani	\$551,916,733
Tupe Faameaalofa mai Fafo	\$137,096,948

##### **Tupe Faaalu**

**\$785,357,784**

Tupe Faaalu Faaletulafono	\$103,298,657
Tupe Faaalu i Polokalame	\$478,223,687
Tupe Faaalu i Atinae	\$189,488,730
Tupe Faaalu le Fuafuaina	\$14,346,711

##### **Faasiliga o Tupe Alu i Tupe Maua**

**\$96,344,104)**

Faatupeina mai:

Nonogatupe e māmā tului	\$84,082,700
-------------------------	--------------

##### **Tupe Pa'ū**

**\$12,261,404)**

O le aotelega o le Tala o le Tupe, ua faamoemoe e faamauina ai se faasiliga o tupe faaalu nai lo tupe maua e tusa lea ma le \$96.3miliona tala po o le 4.7%

o le tamaoaiga po o le GDP lea na tauina atu muamua e \$2pilion. O lenei faasiliga o le a faatupeina mai nonogatupe maualalo o latou tului. O lona uiga, o nonogatupe ia i atinae o lo o faaaauu pea, ona pei ona silafia, o atinae nei e lua, tolu, fa tausaga o faagasolo pea.

O lenei tulaga o lo o atagia ai le faanaunautaiga a lo tatou Malo, ina ia ausia le 3.5% i se taimi lata mai.

## **V. FAAVAIE O TUPE MAUA**

Lau Afioga i le Fofoga Fetalai,

O le a faaitiitia a tatou tupe maua masani i le 0.2%, e mafua lea i faatosina e uunaiina ai le atinae o faletalimalo, oloa gaosi faapea malosiaga faafouina, e masani ona lafoai ai ia lafoga ma tiute e faatosina mai ai pisinisi nei. Pei ona taua muamua, e 23% o le a pau ai tupe faameaalofa mai o tatou paaga talu ai ona ua suia le faatulagana o aitalafu a Samoa mai le “high debt distress” i le “medium debt distress” ma ua avefa ma tulaga e le toe agavaa ai Samoa i le 100% atoatoa o meaalofa, ae ua agavaa nei i le na o le 50% tupe faameaalofa a o le paleni e 50% o tupe nono.

Ina ia ausia taiala mo le soifua manuia faapea le tali atu i suiga o le tau, o lea ua manatu ai le Malo e faatino faiga faavae o lo o taua i lalo mo le tausaga fou faaletupe 2015/2016:

### **1. *Lafoga i faguinu suamalie, ava malosia ma tapaa***

O le soifua maloloina o tagatanuu o Samoa, o se luitau e ave i ai le faamuamua a le tatou Malo. O le tele o faamai ua maliliu ai le toatele o le tatou atunuu ma le Pasefika atoa e aofia ai le tino puta pe mafua mai i le tino puta, o le totomauluga, o le mai suka ma nisi o lo o faatupulaia pea, talu ai lava nei mea o taumafa.

Ua matauina foi ia le faatupulaia pea o vaegatupe faaalu a lo tatou Malo e tau togafiti ai gasegase nei, e mafua mai i taumafa ia lea e mafua ai le lafoga. Ia ina ia faaitiitia nei tulaga o lea o le a faatino ai le lafoga mo faguinu suamalie faapea le ava malosia tusa ma le 6.5% faatasi ai ma le 5% o le lafoga i tapaa.

### **2. *Lafoga mo le atinae o malosia faafouina.***

O aafiaga ona o suiga o le tau, o ni luitau o lo o feagai ma atunuu uma lava o le lalolagi, o le faaaogaina o suauu o lo o tele ai nei le aafia o le siosiomaga ma le fesuiaga o le tau, a o lea e faaaoga mo so o se atinae, ua matua mautinoa e tele se aafiaga o le siosiomaga, ma e tele le sao o le faatupulaia atili o mala faalenatura e pei ona maitauina nei. Ua manatu nei la le Malo e uunaia le atinae o malosia faafouina o le eletise ina ia tuutiitia ai le faaleagaina o le siosiomaga ona o kasa oona.

Ina ia ausia lea tulaga, o lea o le a faapoopo ai sina tamai lafoga e 6.5sene i le lita i suauu e faaulufale mai aua le uunaia o atinae o le malosia faafouina. O lenei fuafuaga o le a vave ausia ai foi le ono faaitiitia o pili eletise mo le mamalu o le atunuu, faapea le taunuu o le manulauti ina ia selau pasene le eletise e maua mai i le malosia faafouina i le tausaga 2017.

## **VI. ATINA'E FAAMUAMUA**

Lau Afioga i le Fofoga Fetalai ma sui usufono mamalu o le Palemene, o le a oo atu sina upu e talanoa i atinae o lo o ave i ai le faamuamua. O le aofaiga o tupe faaalu fuafua mo le 2015/2016, e \$785miliona, tusa lea ma le 2% e pau ai pe a faatusa i le tausaga o lo o faagasolo nei. O lo o atagia mai ai le naunautai o le Malo ina ia faasoasoaa tatau tupe faaalu e fua i tupe maua ina ia ausia alafua tau tupe ua talafeagai.

O le a ou auiliiliina atu atinae o lo o ave i ai le faamuamua mo le tausaga faaletupe 2015/2016.

### **1. Soifua Maloloina.**

E \$79miliona ua faaagaaga mo atinae ma polokalame a le vaega o le Soifua Maloloina e tusa lea ma le 17% o le aotelega o tupe faaalu. O vaega nei ua ave i ai le faamuamua.

- \$7.6miliona e faatino ai le tautua a le Matagaluega o le Soifua Maloloina;
- \$6.1miliona e fesoasoani ai i le Faalapotopotoga mo Gasegase Faamamatoto;
- \$63.8miliona ua faaagaaga lea mo le auunaga faale-soifua maloloina;
- \$2.5miliona ua faaagaaga nei mo gasegase e moomia ai togafitiga i fafo.

### **2. A'oa'oga**

E 79miliona ua fuafua mo atinae o aoga, e tusa lea ma le 16.5% o le aotelega o le atinae a le tatou Malo po o le 4% pe a fua i le tamaoaiga, o vaega nei o le a ave i ai le faamuamua.

- \$50.4miliona mo auunaga a le Matagaluega o Aoga;
- \$6miliona ua faaagaaga e faameaalofa atu mo aoga a Ekalesia ma Aoga Tumaoti i le tausaga fou faaletupe;
- E \$2.76miliona e fesoasoani atu ai i le Pulega o Faailoga ma Tusi Pasi Taualoa a Samoa;
- E \$11miliona e faamatuu atu mo le Iunivesite Aoa o Samoa.
- E \$1miliona ma le afa e faatupe ai api, peni ma meaaoga uma e faaoga e fanau aoga mo aoga uma a le tatou Malo.

E le o aofia ai le \$5.7miliona i lalo o le Matagaluega o Tupe o lo o fuafua nei mo le faatinoina o le polokalame mo pili aoga e fesoasoani ai i le faaaogaina o fanau a le atunuu, le vaega foi lea ua le toe faauuina ai pili nei mai Niu Sila.

### **3. Atina'e Tetele**

#### ***Eletise***

E \$11.3miliona se vaegatupe o lo o tuuina mai i le malosiaga tau eletise mo latou auaunaga masani. Mai leni aofaiga, e \$7miliona e totogi ai lafoga tau suauu faaulufale mai. A o le paleni e \$4.3miliona e faaagaga mo le auaunaga mo nuu ma alaalfaga i tua e moomia se faamamaavega mai le tatou Malo e auala atu i atinae o le eletise.

#### ***Suavai***

E \$12miliona o le a faamatuu atu i le Pulega o le Suavai. Mai lea aofaiga, e \$4.22miliona e fesoasoani i auaunaga mo nuu ma afioaga i tua, ma le \$7.78miliona mai le Iuni a Europa mo atinae tetele aua le siitia o le auaunaga masani.

#### ***Auala Tetele ma Ala Laupapa***

O le aofaiga o le fesoasoani a le tatou Malo mo le Pulega o Felauaiga i le Laueleele e \$19.9miliona aua galuega faaleleia mo aualatetele ma auala laupapa. O leni vaegatupe, e 17% e itiiti ai nai lo le tausaga o lo o faagasolo nei e faamuta mai i le faaiuga o le masina fou o Iuni, ma e atagia mai ai le faamaeaina o le tele o galuega sa moomia talu mai aafiaga mai le afa o Evani.

#### ***Fesootaiga Tau Tekonolosi***

O le vaega leni mo Fesootaiga tau Tekonolosi o se tasi o vaega o lo o ave i ai le faamuamua a le tatou Malo talu ai lona sao i le atinae o pisinisi aemaise o le atinae o le tamaoiga atoa. Ina ia faamausaliina leni faamuamua, o atinae nei o lo o faasaga i ai le fesoasoani a le Malo;

- \$4.23miliona e fesoasoani ai i galuega ma auaunaga a le Matagaluega o Fesootaiga;
- E \$1.74 ua tuuina atu mo auaunaga a le Ofisa o le Pule Faatonu;
- E \$1.2miliona le sao o le Malo e totogi ai auaunaga o fesootaiga tau initaneti e faaogaina ai peau lautetele mo fesootaiga i Samoa (National Broadband Highway);
- O lo o i ai foi se fesoasoani faameaalofa mai le Faletupe o Asia ma le Faletupe o le Lalolagi, tusa lea ma le \$7.4miliona e faatupe ai se isi auupega mo fesootaiga tuusao o lo o i le taele o le sami po o le submarine cable, o uaea ia e fetaii i lalo o le vasa laulau.

### **4. Faatoaga**

O le aofai o tupe faaalu fuafua mo le atinae o faatoaga e \$13.6miliona mo le tausaga 2015/2016 aua vaega tetele nei. E \$11.3miliona e tuuina atu mo galuega a le Matagaluega o Faatoaga ae afa miliona tala o le a faaagaaga lea mo polokalame masani mo le faalauiloaina o fua o faaeleeleaga. E le o aofia i totonu o nei aofaiga fesoasoani o lo o tuuina mai i le faletupe o le lalolagi e \$4.9miliona aua le uunaia o atinae tau faatoaga po o le SACEP e aofia ai le atinae o fualaau aina ma lafumanu papalagi ina ia tuutiitia le faalagolago pea i oloa faatauina mai fafo mo le fofoga taumafa. O lo o i ai foi ma se vaegatupe e \$3.7miliona e fesoasoani ai i le toe faaleleia o faatoaga sa aafia

tele i le afa o Evani. O lo o fesoasoani mai foi le faletupe o Asia i le uunaia o pisinisi mo faifaatoaga lea o lo o tuuina mai i ai le \$370,000 mo le tausaga faaletupe 2015/2016.

## **5. Fefaatauaiga o Pisinisi ma Alamanuia**

O le atinae o Fefaatauaiga ma Oloa Gaosi, tasi lea vaega o lo o ave i ai le faamuamua aua e faalagolago tele i ai le atinae o le tamaoaiga. O nisi nei o vaega o lo o ave i ai le faamuamua;

- \$3.98milionia o le a tuuina atu mo le faatinoina o auunaga a le Matagaluega o Pisinisi, Alamanuia ma Leipa.
- E \$9.32milionia e fesoasoani ai i galuega faatino a le Ofisa mo tagata tafafao maimoa mai fafo.
- E \$450,000 e tuu atu e fesoasoani ai i galuega a le Ofisa mo le atinae o pisinisi laiti (SBEC).
- E \$200,000 e tuuina atu lea mo le vaega tumaoti,
- \$125,300 e fesoasoani i le faaauuina o le polokalame o aperenitisi o lo o faatautaia e le Iunivesite Aoao o Samoa.

## **6. Taaloga mo Tupulaga Talavou o Malo o le Taupulega 2015**

E \$5milionia ua faaagaaga nei aua taligamalo mo taaloga a tupulaga talavou o Malo o le Taupulega e 54 Malo, e pei ona fuafuaina mo le masina o Setema 2015. O lenei faamoemoe, tusa e 1,500 tagata o le a malaga mai ai mai atunuu e 69 o le Taupulega, lona uiga e aofia ai ma isi Teritori i tua atu o Malo e 54 tumaoti pe tutoatasi o le Taupulega.

## **VII. VAEGATUPE LE FUAFUAINA**

E \$14.3milionia se vaegtatupe o lo o faaagaaga nei mo ni faamoemoe e le fuafuaina e ono tulai mai i totonu o le tausaga faaletupe 2015/2016.

## **VIII. TALA FAAOPOPO LONA LUA O LE TUPE 2014/2015**

O le Tala Faatatau Faaopopo Lona Lua o le Tupe o lo o faagasolo nei, ua tuuina atu faatasi ma le Tala Faatatau Faaopopo (Nu.2) o Tupe 2014/2015. O lenei Tala Faatatau Faaopopo Lona Lua o le Tupe e leai sona tau faaopopo ma o le a faatupe lava i fetuunaiga o seleni o lo o i ai nei i totonu lava o le Tala o le Tupe o lo o faagasolo.

## **IX. UPU FAAIU**

Lau Afioga i le Fofoga Fetalai ma le mamalu o le Maota,

O lenei Tala o le Tupe o lo o faavae i le sini autu e faapea; “Fua le manao i seleni ua maua.” O le taiala aupito sili lea ona talafeagai mo se tamaoaiga e mausali, e le mafai le mafai ona tatou faalagolago pea lava i le agalelei o tatou paaga mai fafo. E tatau foi ona tatou tagai totoa i tupe maua o lo o afua mai i le lotoifale ma fesili, o a atinae e tatau ona ave i ai le faamuamua e gafatia e seleni ua maua? E tatau foi ona fuafua tatau galuega e ono ave i ai le

faamuamua ina ia aua ne i oia auaunaga mo le mamalu o le atunuu. O le taunuuga lea o le siitia o le tulaga o le tamaoaiga o Samoa mai le atunuu tauatia e i le atunuu ua maualuga lona tamaoaiga.

Ma o aga masani lava ia i le tatou soifua po o le natura o le soifua e oo loa i le tulaga ua atiae ai le Malo, ona faapena foi lea ona tuutiitia foi mai a isi Malo ona o lea lava ua mafai ona tauave e tatou le tatou lava Malo.

Lau Afioga i le Fofoga Fetalai ma sui usufono mamalu o le Maota, e fia faaleo le agaga faafetai a le Malo i a tatou paaga o lo o saofaga i le atinae o Samoa, faafetai agalelei ma lagolago mai i le atinae o le tatou atunuu. E fia faamauiina foi le faafetai i le mamalu o le atunuu mo la outou lagolagosua aemaise o talosaga aua se manuia o le tatou atunuu. O la matou tatalo, ia i ai pea le agalelei ma faamanuiaga a le Atua ia Samoa a o tatou agai atu i le faamanatuina o le 53 o le Tutoatasi o lo tatou Malo.

Lau Afioga i le Fofoga Fetalai, i le agaga faaaloalo tele, ou te tuuina atu ai le Tala Faatatau Autu o le Tupe mo le tausaga 2015/2016 mo le lauliuina e le Palemene. Soifua.

*Na faaalua le agaga fiafia o le Maota i le patipati o latou aao ina ua maea le Saunoaga a le Minisita o Tupe i le Tala Faatatau o le Tupe 2015/2016.*

**FOFOGA FETALAI:** E momoli atu le agaga faafetai tele e tusa ai ma le saunoaga autu o le tatou Tala o le Tupe na saunoa i ai le Afioga i le Palemia, ma e manatu foi o lea ua manino le faafofoga a le Maota vaeane le tapuaiga a Samoa o lo o tatou faatasi aemaise foi o le faafofoga tapuai mai a si o tatou atunuu. E momoli atu ai le faafetai tele e fai ai lou leo e fai ma fofoga taumomoli o le Maota nei e faafetai atu ai i lau Afioga i le Palemia ma lau Matagaluega, aemaise o le Ofisa Sili o Pulega o le Matagaluega o Tupe ma le paia o le Kapeneta e ala i le tapenaina mai o lenei Tala o le Tupe. Ou te talitonu o lea ua taatia le lafo a Lualemaga i le Maota nei ma tatou manatu ai, ua faatulaga i a tatou Tulafono Tumau, o le a tuu atu i aao o le Afioga i le Taitaifono ma le Komiti o Tupe i totonu o le 14 aso, ona faapena lea ona toe lipoti mai i le tatou Fono Aoa. Ou te manatu ua tatou taunuu ai foi i le taunuuga o tatou galuega o lenei aso.

Tulai mai lau Afioga i le Palemia.

## **LAFO MO LE TOLOPOINA**

**Susuga Hon TUILAEPFA FATIALOFA LUPESOLIAI AIONO NEIOTI SAIILELE MALIELEGAOI:** Lau Afioga i le Fofoga Fetalai ou te tulai atu ma le faaaloalo, *Ina ia tolopoina nei Taulumaga a le Fono Aoa Faitulafono seia aulia le Aso Tofi, 18 Iuni 2015.*

*Faaluaina e le Sui Palemia ma le Minisita mo Galuega Tau Alamanuia ma Atinae a le Malo.*

## **SAUNOAGA FAAFETAI A LE FOFOGA FETALAI**

**FOFOGA FETALAI:** Ae le i faamaonia le lafo, ia o le agaga lena na aveatu nei e le Fofoga Fetalai o le faafetai atu.

Faamalo atu le onosai i lenei aso i le paia ma le mamalu o le tatou Maota i sui usufono mamalu uma o le tatou Maota Fono, e manatu ia ua fai sina tele o le tatou galuega o lenei aso, e le gata i nisi o Tulafono taua e i ai le tatou Tulafono Tau Faaofi o Teuteuga o le Tulafono o Faiga Palota (Nu. 2) 2015, aemaise o le Tulafono Tau Faaofi o Teuteuga o le Faavae (Nu. 2) 2015, ia o lo o faapena ona manatu ua tataua ona matua tilitili alulua ina ia faataatia i lagotonu le faagaioiga o galuega a le Faiga Palota. O lea ua matauina i lenei aso, ua faaiuina ma ua tuu atu loa aua le faagaioiina o galuega e pei ona masani ai.

O le agaga faafetai lea e momoli atu i le paia ma le mamalu o le tatou Maota Fono, ia ua tini tauao le tatou galuega ma o lea ua suni tau i le tini, ona o lo outou onosai, aemaise foi o le lavapapale ma le sailiga o le tatou tofa e le faigofie. Ou te manatu o a foi upu ma tala ma tiuga o le vaatele i lenei aso, ia tatou lafo i nuu le aina, e toe sau malama, o le taeao fou e tatou te moe manatunatu ma moe alaala ma o tatou lagona faatasi le agaga faafetai i le Atua, o lea ua tatou taunuu i le faaiuga o le galuega o lenei aso.

E i ai le faamoemoe e le aoaia e Laupua Tamafaiga i lau Afioga i le Taitaifono ma le Komiti o Tupe, ia o tatou tulaga masani i le faaauuina o tatou galuega, e lafo atu i la outou pitolaau aua le lauiluina ma toe lipoti mai i le tatou Maota, ona faapena lea ona toe faagasolo ai Tualumaga o le tatou Fono Aoao.

Faafetai atu foi i le tapuaiga a si o tatou atunuu Samoa, ia e manatu i lenei aso ua logoā logoī lau faafofoga, ua logo faa-Tutuila lau tapuaiga, e manatu foi e le mafai ona alo tamala le Palemene leaga o lo o e po pea le fala ma ula le mulila, i lou tapuai mai a o matou alo i feau ma tiute ma galuega aemaise lo matou valaauina. Faamalo tapuai, faafetai tatalo i le paia o le atunuu ma le Aufaigaluega, o lea ua ae ma le manuia le Fonotaga o lenei masina ma lenei aso, aemaise o lea ua faatini le Tala Autu o le Tupe e lipoi ai ma lufilufiina le tamaoiga o le atunuu aua se manuia mo Samoa a taeao.

E faaiu sa matou faamatalaga i Faauluuluga o Matagaluega ma Faalapotopotoga a le Malo, malo le onosai, e manatu o lenei aso o lea lava e tou te faaopeopea ma outou aitaumalele i le Maota nei ona o lo outou manatu, ia o lo outou faiva alofiliima lea aua le tautuaina o lo tatou Malo, ia maua lo outou malosia i le tino le agaga ma le mafaufau e faafoefoe ai a tatou galuega. E ofo alofa atu ma momoli atu moomooga alofa mo le tatou Sisigafua o le a tatou alo atu i ai, talosia i le Atua ia ulimasao mea uma. Ia mamao ni lagilagia ma ni mala o fotuai mai i le atunuu, ae ia tumau ma folau Samoa i le lagima ma le soifua manuia.

Ae le i faaiuina le tatou Fonotaga ou te tatalo atu i lau Afioga i le sui usufono mo Sagaga le Usoga o se tasi o sui usufono fou o le tatou Maota e tulai mai e fai se tatou tatalo faaiu, ia ona tatou malolo ai lea.

*Na faamaonia le lafo.*

***Na tolopo Tualumaga a le Fono Aoao i le itula e 2:11 i le aoauli seia aulia le Aso Tofi, 18 Iuni 2015.***